



403
20



13
403
20



太平御覽卷第一百八

皇王部三十三

唐高祖神堯皇帝

唐書曰高祖神堯皇帝姓李氏諱淵其先隴西狄道人涼武昭王暠七代孫也暠生歆歆生重耳仕魏為弘農太守重耳生熙為金門鎮將領豪族鎮武川因家焉儀鳳中追尊宣皇帝熙生天賜仕魏為幢主儀鳳中追尊光皇帝生皇祖諱虎後魏左僕射封隴西郡公與周文帝及太保李弼大司馬獨孤信等以功參佐命當時稱為入柱國家仍賜姓大野氏周受禪追封唐國公至隋文帝作相還復本姓武德初追尊景皇帝廟號太祖皇考諱昞音周安州摠管柱國大將軍襲唐國公謚曰仁武德初追尊元皇帝廟號世祖高祖以周天和元年生於長安七年襲唐國公及



新定圖書

此係明治八年八月八日
由諸田一人
所購以贈



長備儻豁達任性真率寬仁容衆無貴賤咸得其歡心隋受禪補千牛備身文帝獨孤皇后卽高祖從母也由是特見親愛累轉譙隴岐三州刺史有史世良者善相人謂高祖曰公骨法非常必爲人主願自愛勿忘鄙言高祖頗以自負大業初授滎陽樓煩二郡太守徵爲殿內少監九年遷衛尉少卿遼東之役督運於懷遠鎮及楊玄感反詔高祖馳驛鎮弘化郡兼知關右諸軍事高祖歷試中外素樹恩德及是結納豪傑衆多歎附時煬帝多所猜忌人懷疑懼會有詔徵高祖詣行在所遇疾未謁時甥王氏在後宮帝問曰汝舅何遲王氏以疾對帝曰可得死不高祖聞之益懼因縱酒沉湎納賄以混其迹焉十一年煬帝幸汾陽宮命高祖往山西河東黜陟討捕師次龍門賊帥母端兒帥衆數千薄于城下高祖從十餘騎擊之所射七十發皆

應弦而倒賊乃大潰十三年爲太原留守郡丞王威武牙郎將高君雅爲副將羣賊蜂起江都阻絕太宗與晉陽令劉文靜及門下客長孫順德劉弘基各募兵旬日間衆且一萬密遣使召世子建成及元吉于河東威與君雅見兵大集恐高祖爲變相與疑懼請高祖祈雨於晉祠將爲不利晉陽鄉長劉世龍知之以告高祖陰爲之備五月甲子高祖與威君雅視事太宗密嚴兵於外以備非常遣開陽府司馬劉政會告威等謀反卽斬之以徇遂起義兵遣劉文靜使於突厥始畢可汗令率兵相應六月甲申命太宗將兵徇西河下之癸巳建大將軍府并置三軍分爲左右開倉庫以賑窮乏遠近響應秋七月高祖率兵西圍關中以元吉爲鎮北將軍太原留守癸丑發自太原有兵三萬景辰師次靈石縣營於賈胡堡隋武牙郎將宋老生屯霍

卷一百八
邑以拒義師會霖雨積旬餽運不給高祖命旋師太宗切諫乃止有白衣老父詣軍門曰余爲霍山神使謁唐皇帝日八月雨止路出霍邑東南吾當濟師高祖曰此神不欺趙無卹豈負我哉八月辛巳高祖引師趨霍邑斬宋老生平霍邑景茂進下臨汾郡及絳郡癸巳至龍門突厥始畢可汗遣康稍利率兵與劉文靜會于麾下隋驍衛大將軍屈突通鎮河東津梁斷絕關中向義者頗以爲阻於是水濱居人競進舟楫不謀而至者前後數百人九月壬寅馮翊賊帥孫華土門賊帥白玄度各率其衆送款并具舟楫以待義師高祖令華與統軍王長諧劉弘基引兵渡河屈突通遣其武牙郎將桑顯和率兵數千夜襲長諧義師不利太宗以遊騎數百掩其後顯和潰散義軍復振景辰馮翊太守蕭造以郡來降戊午高祖親率衆圍河東屈突通

自守不出乃命攻城不利而還文武將吏請高祖領太尉加置僚佐從之華陰令李孝常以永豐倉來降庚申高祖率軍濟河舍于長春宮三秦士庶至者日以千數高祖禮之咸過所望人皆喜悅景寅遣隴西公建成司馬劉文靜屯兵永豐倉兼守潼關以備他盜太宗率劉弘基長孫順德等前後數萬人自渭北徇三輔所至皆下高祖從父弟神通起兵鄠縣柴氏婦舉兵於司竹至是並與太宗會乙亥命太宗自渭內屯兵阿城隴西公建成自新豐趣霸上高祖率大軍自下邳西上經煬帝行宮園苑悉罷之宮女放還親屬冬十月辛巳至長樂宮有衆二十萬京師留守刑部尚書衛文昇右翊衛將軍陰世師京兆郡丞骨儀挾代王侑音宥以拒義師高祖遣使至城下諭以匡服之意再三皆不報諸將固請圍城十一月景辰攻拔京城衛文昇

先已病死以陰世師骨儀等拒義兵並斬之癸亥率百僚
備法駕立代王侑爲天子遙尊煬帝爲太上皇大赦改元
爲義寧甲子隋帝詔加高祖假黃鉞使持節大都督內外
諸軍事大丞相進封唐王總錄萬機以武德殿爲丞相府
改教爲令以隴西公建成爲唐國世子太宗爲京兆君改
封秦王姑藏公元吉爲齊公十二月癸未丞相府置長史
司錄已下官僚金城賊帥薛舉寇扶風命太宗爲元帥擊
之遣趙郡公孝恭招慰山南所至皆下癸巳太宗大破薛
舉之衆於扶風屈突通自潼關奔東都劉文靜等追擒於
閩音鄉虜其衆數萬河池太守蕭瑀音以郡降丙午遣雲
陽令詹俊武功縣正李仲袞徇巴蜀下之二年春正月戊
辰世子建成爲撫寧大將軍東討元帥太宗爲副總兵七
萬徇地東郡三月景辰右屯衛將軍宇文化及弒隋太上

皇於江都宮立秦王浩爲帝自稱大丞相徙封太宗爲趙
國公戊辰隋帝進高祖位相國總百揆備九錫之禮唐國
置丞相己下立皇高祖己下四廟於長安通義里第夏四
月戊戌世子建成及太宗自東都班師五月乙巳天子詔
高祖冕十有二旒建天子旌旗出警入蹕王后王子王女
爵命之號一遵舊典戊午隋帝詔遣使持節兼太保刑部
尚書光祿大夫梁郡公蕭造兼太尉司農少卿裴之隱奉
皇帝璽紱于高祖高祖辭讓百寮上表勸進至于三乃從
之隋帝遜于舊邸改大興殿爲太極殿甲子高祖卽皇帝
位於太極殿命刑部尚書蕭造兼太尉告於南郊大赦天
下改隋義寧二年爲唐武德元年官人百姓賜爵一級義
師所行之處給復三年罷郡置州改太守爲刺史丁卯宴
百官于太極殿賜帛有差東都留守共立隋越王侗音爲

帝壬申命相國長史裴寂等修律令六月甲戌太宗爲尚書令廢隋大業律令頒新格己卯備法駕迎皇高祖宣簡公己下神主祔于太廟追謚妃竇氏爲穆皇后庚辰立世子建成爲皇太子封太宗爲秦王齊國公元吉爲齊王諸州摠管加號使持節癸未封隋帝爲酈國公薛舉寇涇州命秦王爲西討元帥征之改封永康王神通爲淮安王壬辰加秦王雍州牧餘官如故秋七月秦王與薛舉大戰於涇州我師敗績八月壬午薛舉死其子仁果復僭稱帝命秦王爲元帥以討之涼州賊帥李軌以其地來降拜涼州摠管封涼王九月乙巳親錄囚徒辛未追謚隋太上皇爲煬帝宇文化及至魏州鳩殺秦王浩僭稱天子國號許冬十月李密率衆來降十一月秦王大破薛仁果於淺水原降之隴右平乙巳涼王李軌僭稱天子於涼州詔頒五十

三條格以約法緩刑十二月壬申加秦王太尉陝東道大行臺庚子李密叛於桃林行軍摠管盛彥師追討斬之二年春二月丁酉竇建德攻宇文化及于聊城斬之傳首突厥閏月辛丑劉武周侵我并州己酉李密舊將徐世勣以黎陽之衆及河南十郡降授黎州摠管封曹國公賜姓李氏庚戌上徵行都邑以察毗俗卽日還宮甲寅賊帥朱粲殺我使散騎常侍段確奔洛陽夏四月乙巳王世充篡越王侗位僭稱天子國號鄭辛亥李軌爲其僞尙書安興貴所執以降河右平九月辛未賊帥李子通據江都僭稱天子國號吳沉法興據毗陵僭稱梁王丁丑和州賊帥杜伏威遣使來降授和州摠管東南道行臺尙書令封楚王裴寂與劉武周將宋金剛戰於介州我師敗績右武衛大將軍姜寶誼死之并州摠管齊王元吉懼武周所逼奔于京

太平御覽 卷一百八 五
師并州陷乙未京師地震甲子上親祠華岳十一月景子
竇建德陷黎陽盡有山東之地淮安王神通左武侯大將
軍李世勣皆沒於賊十二月景申永安王孝基工部尚書
獨孤懷恩摠管于筠爲劉武周宋金剛掩襲並沒焉甲辰
狩于華山壬子大風拔木三年春正月辛巳幸蒲州命祀
舜廟癸巳至自蒲州甲午李世勣於竇建德所自拔歸國
建德僭稱夏王四月甲寅加秦王益州道行臺尚書令秦
王大破宋金剛於介州金剛與武周俱奔突厥遂平并州
僞摠管尉遲敬德相尋以介州降六月壬辰徙封楚王杜
伏威爲吳王賜姓李氏加授東南道行臺尚書令景午親
錄囚徒七月壬戌命秦王率諸軍討王世充遣皇太子鎰
蒲州以備突厥景申突厥殺劉武周於白道冬十月庚子
懷戎賊帥高開道遣使降授蔚州摠管封北平郡王賜姓

李氏四年五月己未秦王大破竇建德之衆於武牢擒建
德河北悉平景寅王世充舉東都降河南平秋七月甲子
秦王凱旋獻俘於太廟丁卯大赦天下廢五銖錢行開通
元寶錢斬竇建德於市流王世充於蜀甲戌建德餘黨劉
黑闥據漳南反置山東道行臺尚書省於洺州八月兖州
摠管徐圓朗舉兵反以應劉黑闥僭稱魯王冬十月乙丑
加秦王天策上將軍位在王公上領司徒陝東道大行臺
尚書令齊王元吉爲司空乙巳趙郡王孝恭平荊州獲蕭
銑五年春正月景申劉黑闥據洺州僭稱漢東王三月丁
未秦王破劉黑闥于洺水上盡復所陷州縣黑闥亡奔突
厥蔚州摠管北平王高開道叛寇易州夏四月庚戌秦王
還京師高祖迎勞於長樂宮壬申代州摠管定襄郡王大
恩爲虜所敗戰死六月劉黑闥引突厥寇山東置諫議大

夫官負秋七月隋漢陽太守馮盎以南越之地來降嶺表
悉定八月辛亥以洛荆并幽交五州爲大摠管府改封恒
山王承乾爲中山王葬隋煬帝于楊州景辰突厥頡利寇
鴈門己未進寇朔州遣皇太子及秦王討擊大敗之冬十
月己酉遣齊王元吉擊劉黑闥於洛州時山東州縣多爲
黑闥所守所在殺長吏以應之行軍摠管淮陽王道玄與
黑闥戰于下博道玄敗沒十一月甲申命皇太子率兵討
劉黑闥景申幸宜州簡閱將十二月景辰校獵於華池
庚申至自宜州皇太子破劉黑闥於魏州斬之山東平六
年春二月辛亥校獵於驪山三月乙未幸昆明池宴百官
夏四月己未幸舊宅改爲通義宮曲赦京城繫囚於是置
酒高會賜從官帛各有差癸酉以尚書右僕射魏國公裴
寂爲左僕射中書令宋國公蕭瑀爲右僕射秋七月突厥

頡利寇朔州遣皇太子及秦王屯并州以備之八月壬子
東南道行臺僕射輔公祏據丹陽反僭稱宋王遣趙郡王
孝恭及嶺南道大使永康縣公李靖討之景寅吐谷渾內
附九月景子突厥退皇太子班師七年二月丁巳幸國子
學親臨釋奠改大摠管府爲大都督府三月戊寅廢尚書
省六司侍郎增吏部郎中秩正四品掌選事戊戌趙郡王
孝恭大破輔公祏擒之丹陽平夏四月庚子大赦天下頒
行新律令以天下大定詔遭父母喪者聽終制五月造仁
智宮於宜州之宜君縣李世勣討徐圓朗平之六月辛丑
幸仁智宮秋七月音嶺州地震山崩江水咽流八月戊辰
突厥寇并州京師戒嚴壬午突厥退乙未京師解嚴八年
夏六月甲子幸太和宮突厥寇定州命皇太子往幽州秦
王往并州以備突厥八月并州道摠管張公謹與突厥戰

于大谷王師敗績中書令温彦博沒於賊九月突厥退冬
十月辛巳幸周氏陂校獵因幸龍躍宮九年春正月景申
命州縣修城隍備突厥尚書左僕射魏國公裴寂爲司空
二月庚申加齊王元吉爲司徒戊寅親祀社稷三月辛卯
幸昆明池六月庚申秦王以皇太子建成與齊王元吉同
謀害己率兵誅之詔立秦王爲皇太子總統萬機大赦天
下八月癸亥詔傳位于皇太子尊帝爲太上皇徙居弘義
宮改名大安宮貞觀八年三月甲戌高祖讌西突厥使者
於兩儀殿顧謂長孫無忌曰當今蠻夷率服古未嘗有無
忌上千萬歲壽高祖大悅以酒賜太宗太宗又奉觴上壽
流涕而言曰百姓獲安四夷咸附皆奉遵聖旨豈臣之力
於是太宗與文德皇后互進御膳并上服御衣物一同家
人常禮是歲閱武於城西高祖親自臨視勞將士而還置

酒於未央宮三品已上咸侍高祖命突厥頡利可汗起舞
又遣南越酋長馮智戴詠詩旣而笑曰胡越一家自古未
之有也太宗奉觴上壽曰臣早蒙慈訓教以文道爰從義
旗平定京邑重以薛舉武周世充建德皆上稟睿筭幸而
尅定三數年間混一區宇天慈崇寵遂蒙重任今上天垂
祐時和歲阜被髮左衽並爲臣妾此豈臣智力皆由上稟
聖筭高祖大悅群臣皆呼萬歲九年五月庚子高祖大漸
下詔從漢制以日易月園陵制度務從儉約是日崩於太
安宮之垂拱前殿年七十謚曰大武皇帝廟號高祖葬獻
陵高宗上元元年改上尊號曰神堯皇帝天寶十三年上
尊號曰神堯大聖大光孝皇帝

太平御覽卷第一百八

唐書曰太宗文皇帝諱世民高祖第二子也母曰太穆順
聖皇后竇氏隋開皇十八年十二月戊午生於武功之別
館時有二龍戲於館門之外三日而去高祖之臨岐州太
宗時年四歲有書生自言善相謁高祖曰公貴人也且有
貴子因見太宗曰龍鳳之姿天日之表年將二十必能濟
世安民矣高祖懼其言大將殺之忽失所在陰採濟世安
民之義以為名焉太宗幼聰敏立鑒深遠臨機果斷不拘
小節時人莫能測也大業末煬帝於鴈門為突厥所圍太
宗應募救援隸屯衛將軍雲定興營將行謂定興曰必賈
旗鼓以設疑兵且始畢可汗舉國之師敢圍天子必以國

太平御覽卷第一百九

皇王部三十四

唐太宗文皇帝

唐書曰太宗文皇帝諱世民高祖第二子也母曰太穆順
聖皇后竇氏隋開皇十八年十二月戊午生於武功之別
館時有二龍戲於館門之外三日而去高祖之臨岐州太
宗時年四歲有書生自言善相謁高祖曰公貴人也且有
貴子因見太宗曰龍鳳之姿天日之表年將二十必能濟
世安民矣高祖懼其言大將殺之忽失所在陰採濟世安
民之義以為名焉太宗幼聰敏立鑒深遠臨機果斷不拘
小節時人莫能測也大業末煬帝於鴈門為突厥所圍太
宗應募救援隸屯衛將軍雲定興營將行謂定興曰必賈
旗鼓以設疑兵且始畢可汗舉國之師敢圍天子必以國

家倉卒無援我張軍容令數十里幡旗相續夜則鉦鼓相應虜必謂救兵雲集望塵而遁矣不然彼眾我寡悉軍來戰必不能支矣定興從之師次崞音郭縣突厥候騎馳告始畢曰王師大至由是解圍而遁及高祖之守太原太宗時年十八有高陽賊帥魏刀兒自號歷山飛來攻太原高祖擊之深入賊陣太宗輕騎突圍而進射之所向皆披靡拔高祖於萬眾之中適會步兵至高祖與太宗又奮擊大破之時隋祚已終太宗潛圖義舉每折節下士推財養客及義兵起乃率兵略徇西河尅之拜右領大都督右三軍皆隸焉封燉煌郡公大軍西上賈胡堡音保隋將宋老生率精兵二萬屯霍邑以拒義師會久雨糧盡高祖與裴寂議且還太原以圖後舉太宗曰本興大義以救蒼生當須先入咸陽號令天下遇小敵即班師將恐從義之徒一朝解體

還守太原一城之地以爲賊耳何以自全高祖不納促令引發太宗遂號泣於外聲聞帳中高祖召問其故對曰今兵以義動進戰則必尅退還則必散眾散於前敵乘於後死亡須臾而至是以悲耳高祖乃悟而止入月己卯雨霽高祖引師趣霍邑太宗恐老生不出戰乃將數騎先詣其城下舉鞭指麾若將圍城者以激怒之老生果怒開門出兵背城而陣高祖與建成合陣於城東太宗及柴紹陣於城南老生麾兵疾進先薄高祖而建成墜馬老生乘之高祖與建成軍咸却太宗自南原率二騎馳下峻坂衝斷其軍引兵奮擊賊眾大敗各捨仗而走懸門發老生引繩欲上遂斬之平霍邑至河東關中豪傑爭走赴義太宗請進師入關取永豐倉以賑窮乏收群盜以圖京師高祖稱善太宗以前軍濟河先定渭北三輔吏民及諸豪猾詣軍門

請自効者日以千計扶老攜幼滿於麾下收納英俊以備僚列遠近聞者咸自託焉師次于涇陽勝兵九萬破胡賊劉鷓子以并其衆留殷開山劉弘基屯長安故城太宗自趣司竹賊帥李仲文何潘仁向善志等皆來會頓於阿城獲兵十三萬長安父老賫牛酒詣旌門者不可勝紀勞而遣之一無所受軍令嚴肅秋毫無所犯尋與大軍平京城高祖輔政授唐國內史改封秦國公會薛舉以勁卒萬人來逼渭濱太宗親擊之大破其衆追斬萬餘級略地至于隴坻義寧元年十二月復爲右元帥摠兵十萬徇東都及將旋謂左右曰賊見吾還必相追躡設三伏以待之俄而隋將段達率萬余人自後而至度三王陵發伏擊之段達大敗追奔至于城下因於宜陽新安置熊穀二州戍之而還徙封趙國公高祖受禪拜尚書令右武侯大將軍進封

秦王加授雍州牧三年七月摠率諸將攻王世充於洛邑師次穀州世充率精兵三萬陣於慈澗太宗以輕騎挑之時衆寡不敵陷於重圍左右咸懼太宗命左右先歸獨留後殿世充驍將單雄信數百騎夾道來逼交槍競進太宗幾爲所敗太宗左右射之無不應弦而倒獲其大將燕頤世充乃拔慈澗之鎭歸于東都太宗遣行軍摠管史萬寶自宜陽南據龍門劉德威自太行東圍河內王君廓自洛口斷賊糧道又遣黃君漢夜從孝永河中下舟師襲迴洛城尅之黃河已南莫不響應城堡相次來降大軍進屯邙山九月太宗以五百騎先視戰地卒與世充萬餘人相遇會戰復破之斬首三千餘級獲大將陳智略世充僅以身免其摠管楊慶遣使請降遣李世勣率師出轅轅道安撫其衆榮汴洧豫九州相繼來降世充遂求救於竇建德四

年二月又進屯青城官營壘未立世充率衆二萬自方諸門臨穀水而陣太宗以精騎陣於北邙山令屈突通率步卒五千渡水以擊之因誡通曰待兵交即放煙吾當率騎軍南下兵纔接太宗以騎衝之挺身先進與通表裏相應賊衆殊死戰散而復合者數焉自辰及午賊衆始退縱兵乘之俘斬入千人於是進營城下世充不敢復出但嬰城自守以待建德之援建德以兵十餘萬來援世充至于酸棗蕭瑀音屈突通封德彝皆以腹背受敵恐非萬全請退師穀州以觀之太宗曰世充糧盡內外離心我當不勞攻擊坐收其弊建德新破孟海公將驕卒情吾當進據武牢扼其襟要賊若冒險與我爭鋒破之必矣如其不戰旬月間世充當自潰若不速進賊入武牢諸城新附必不能守二賊併力將若之何通又請解圍就險以候其變太宗不

許於是留通輔齊王元吉以圍世充親率步騎三千五百人趣武牢建德自滎陽西上築壘於板渚太宗屯武牢相持二十餘日諜者曰建德伺官軍芻盡俟牧馬於河北因將襲武牢太宗知其謀遂牧馬於河北以誘之詰朝建德果悉衆而至陳兵汜水世充將郭士衡陣於其南綿亘數里鼓譟諸將大懼太宗將數騎升高丘以望之謂諸將曰賊起山東未見大敵今度險而囂是無政令逼城而陣有輕我心我按兵不出彼迺氣衰陣久卒饑必將自退追而擊之無往不尅吾與公等約必以午時後破之建德列陣自辰至午兵士饑倦皆坐列又爭飲水逡巡欲退太宗曰可擊親率輕騎誘之衆繼至建德迴師而陣未及整列太宗先登擊之所向皆靡俄而衆軍合戰囂塵四起太宗率史大柰程麟金秦叔寶宇文歆等纒幡而入直突出其陣

後張我旗幟賊顧見之大潰追奔三十里生擒建德於陣
太宗數之曰我以干戈問罪本在王世充得失存亡不預
汝事何故越境犯我兵鋒建德股慄而言曰今若不來恐
勞遠取乃將建德至東都城下世充懼率其官屬二千餘
人詣軍門請降山東悉平太宗入據宮城令蕭瑀竇軌等
封守府庫一無所取令記室房玄齡收隋圖籍於是誅其
同惡段達等五十餘人大饗將士班賜有差高祖令尚書
左僕射裴寂勞於軍中六月凱旋太宗親被金甲鐵馬一
萬騎甲士三萬人前後部鼓吹俘二僞主及隋氏器物輦
輅獻于太廟高祖大悅行飲至禮以享焉高祖以自古舊
官不稱殊功乃別表徽號用旌勳德十月加號天策上將
軍陝東道大行臺位在王公上增邑二萬戶通前三萬戶
賜金輅一乘充冕之服玉璧一雙黃金六千斤前後部鼓

吹及九部之樂班劍四千人于時海內漸平太宗乃銳意
經籍開文學館以待四方之士行臺司勳郎中杜如晦等
十有八人爲學士每更直閣下降以溫顏與之討論經義
或夜分而罷八年加中書令九年皇太子建成齊王元吉
謀害太宗六月四日太宗率長孫無忌尉遲敬德房玄齡
杜如晦等於玄武門誅之甲子立爲皇太子庶政皆斷決
八月癸亥高祖傳位於皇太子太宗即位于東宮顯德殿
遣司空裴寂柴告于南郊大赦天下癸酉放掖庭宮女三
千余人景子立妃長孫氏爲皇后己卯突厥寇高陵辛巳
行軍摠管尉遲敬德與突厥戰於涇陽大破之斬首千餘
級癸未突厥頡利至于渭水便橋之北遣其酋帥執失思
力入朝爲覘自張形勢太宗命囚之親出玄武門馳六騎
幸渭水之上與頡利隔津而語責以負約俄而衆軍繼至

頡利見軍容既盛又知思力就拘由是大懼遂請和詔許焉即日還宮乙酉又幸便橋與突利刑白馬設盟突厥引退九月景戌頡利獻馬三千疋羊萬口帝不受令頡利歸所掠中國戶口丁未引諸軍衛騎兵統將等習射于顯德殿庭謂將軍以下曰自古突厥與中國更有盛衰若軒轅善用五兵卽能北逐獯鬻周宣驅馳方邵亦能制勝太原至漢晉之君逮于隋代不使兵士素習干戈突厥來侵莫能抗禦致遣中國生民塗炭於寇手我今不使汝等穿池築苑造諸淫費農民恣令逸樂兵士唯習弓馬庶使汝鬪戰亦望汝前無橫敵於是每日引數百人於殿前教射帝親自臨試射中者隨賞弓刀布帛自是後士卒皆爲精銳十月癸亥立中山王承乾爲皇太子貞觀元年春正月乙酉改元三月癸巳皇后親蠶十二月壬午上謂侍臣曰神

仙事本虛妄空有其名秦始皇非分愛好遂爲方士所詐乃遣童男女數千人隨其入海求仙藥方士避秦苛虐因留不歸始皇猶海側以待之還至沙丘而死漢武帝爲求仙乃將女嫁道術人旣無驗便行誅戮據此二事神仙不煩妄求也二年春二月景戌鞞_{上音未下音曷}內屬三月丁卯遣御史大夫杜淹巡關內諸州出御府金寶贖男女自賣者還其父母庚午大赦天下夏四月己卯詔骸骨暴露者令所在埋瘞景申契丹內屬初詔天下州縣並置義倉六月庚寅皇子治生三年春正月辛亥契丹渠帥來朝戊午謁太廟癸亥親耕籍田四月辛巳太上皇徙居大安宮甲子太宗始於太極殿聽政六月戊寅以早親錄囚徒遣長孫無忌房玄齡等祈雨於名山大川中書舍人杜正倫等往關內諸州慰撫又令文武百官各上封事極言得失是

歲戶部奏言中國人自塞外來歸及突厥前後內附開西
夷爲州縣者男女一百二十餘萬口四年春正月乙亥李
靖大破突厥獲隋皇后蕭氏及煬帝之孫正道送之京師
二月己亥幸溫湯甲辰李靖又破突厥于陰山頡利可汗
輕騎遠遁甲寅大赦賜酺五日三月庚辰大同道行軍副
總管張寶相生擒頡利可汗獻於京師甲午以俘頡利告
於太廟夏四月御順天門軍吏執頡利以獻捷自是西北
諸蕃咸請上尊號爲天可汗於是降璽書冊命其君長則
兼稱之九月庚午令收瘞長城之南骸骨仍令致祭壬午
令自古明王聖帝賢臣烈士墳墓無得芻牧春秋致祭冬
十月壬辰幸隴州曲赦岐隴二州給復一年十日校獵於
貴泉谷十三日校獵於魚龍川自射鹿獻於太安宮甲子
至自隴州戊寅制決罪人不得鞭背以明堂孔穴針灸失

所高昌王麴文泰來朝是歲斷死刑二十九人幾致刑措
山東至于海河南至于嶺皆外戶不閉行旅不賫糧焉六
年十二月辛未親錄囚徒歸死罪者二百九十人于家令
明年秋末就刑其後應期畢至詔悉原之是歲党項諸羌
前後內屬三十萬口八年二月乙巳皇太子加元服景午
賜天下酺三日三月庚辰幸九成宮五月丁丑上初服翼
善冠貴臣服進德冠九年五月太上皇崩于太安宮七月
甲寅增修太廟爲六室冬十月庚寅葬高祖於獻陵十三
年春正月乙巳朔謁獻陵曲赦三原縣及行從大辟罪四
月戊寅幸九成宮甲申阿史那結社爾犯御營伏誅壬寅
雲陽石燃者方丈晝如灰夜則有光投草木於上則焚歷
年而止十二月壬辰狩于咸陽是歲滁州言野蠶食榘音解
葉成繭大如柰其色綠片收六千五百七十石高麗新羅

西突厥吐火羅康國安國波斯踈勒于闐焉耆高昌林邑
昆明及荒服蠻酋相次遣使朝貢十五年詔以來年二月
有事太山所司詳定儀制五月壬申并州僧道及老人等
抗表以太原王業所因明年登封已後願時臨幸上於武
成殿賜宴因從容謂侍臣曰朕少在太原喜羣聚博戲暑
往寒逝將三十年矣時會中有舊識上者相與道舊以爲
笑樂因謂之曰他人之言或有面諛公等朕之故人寔以
告朕即日政教於百姓何如人閒得無疾苦耶皆奏卽日
四海太平百姓歡樂陛下力也臣等餘年日惜一日但眷
戀聖化不知疾苦因固請過并州上謂曰飛鳥過故鄉猶
躑躅徘徊況朕於太原起義兵定天下復少小遊觀誠所
不忘岱禮若畢或冀與公等相見於是賜物各有差六月
戊申詔天下諸州舉學綜古今及孝悌淳篤文章秀異者

並以來年二月摠集泰山己酉有星孛于太微犯郎位景
辰停封泰山避正殿以思咎命尚食減膳秋七月甲戌孛
星滅十六年冬十一月景辰狩于岐山辛酉使祭隋文帝
陵丁卯宴武功士女於慶善宮南門酒酣上與父老等涕
泣論舊事老人等遞起爲舞爭上千萬歲壽上各盡一杯
庚午至自岐州十二月癸卯幸温湯甲辰狩于驪山時陰
寒晦冥圍兵斷絕上乘高望見之欲捨其罰恐虧軍令乃
迴轡入谷以避之十七年正月戊申詔圖畫司徒趙國公
無忌等勳臣二十四人於凌煙閣三月丁巳熒惑守心前
星十九日而退夏四月皇太子承乾有罪廢爲庶人景戊
立晉王治爲皇太子大赦賜酺三日己丑加司徒長孫無
忌太子太師司空房玄齡太子太傅特進蕭瑀太子太保
兵部尚書李勣爲太子詹事仍同中書門下三品庚寅上

親謁太廟以謝承乾之過五月乙丑手詔舉孝廉茂才異能之士十八年十一月命太子詹事英國公李勣爲遼東道行軍總管出柳城禮部尚書江夏郡王道宗副之邢部尚書鄭國公張亮爲平壤道行軍總管以舟師出萊州左領軍常何瀘州都督左難當副之發天下甲上召募十萬並趣平壤以伐高麗十九年春二月庚戌上親統六軍發洛陽乙卯詔皇太子留定州監國高士廉攝太子太傅與侍中劉洎中書令馬周太子少詹事張行成太子右庶子高季輔五人同掌機務以吏部尚書安德郡公楊師道爲中書令贈殷比干爲太師謚曰忠烈命所司封墓葺祠堂春秋祀以少牢上自爲文以祭之三月壬辰上發定州以司徒長孫無忌中書令岑文本揚師道從夏四月癸卯誓師於幽州城南因大饗六軍以遣之癸亥李世勣攻蓋牟

城破之五月丁丑車駕渡遼東甲申上親率鐵騎與世勣會圍遼東城因烈風發火弩斯須城上屋及樓皆盡麾戰士令登乃拔之六月景辰師次安市城丁巳高麗別將高延壽高惠真帥兵十五萬來援安市以拒王師李世勣率兵奮擊上自高峯引軍臨之高麗大潰殺獲不可勝紀延壽等以其衆降因名所幸爲駐蹕山刻石紀功焉賜天下大酺二日秋七月李世勣進軍攻安市城至九月不尅乃班師冬十月景辰入臨渝關皇太子自定州迎謁戊午次漢武臺刻石以紀功德十一月幸幽州癸酉大饗還師十二月幸并州二十年春正月上在并州遣大理卿孫伏伽黃門侍郎褚遂良等二十二人以六條巡察四方黜陟官吏庚辰曲赦并州宴從官及起義元從賜帛給復有差三月車駕至京師六月遣兵部尚書固安公崔敦禮特進英

國公李世勣擊破薛延陀於鬱督山北前後斬首五千餘級虜男女三萬餘人二十一年正月詔以來年二月有事泰山甲寅賜京師輔三日八月詔以河北大水停封禪辛未骨利幹國遣使貢名馬二十三年三月辛酉大赦丁卯太宗以不豫勅皇太子於金液門聽政是月日赤無光夏四月己亥幸翠微宮五月己巳上疾甚令草遺詔有頃崩於含風殿年五十二遺詔皇太子即位於柩前喪紀宜依漢制祕不發喪庚午遣舊將統飛騎勁兵從皇太子先還京發六府甲士四千人分列於道及安化門翼從乃入大行御馬輿從官侍御如常壬申發喪六月甲戌殯于太極殿謚日文皇帝廟號太宗葬昭陵上元元年改上尊號曰文武聖皇帝天寶十二載改上尊號為文武大聖大廣孝皇帝

太平御覽卷第一百九

太平御覽卷第一百一十

皇王部三十五

唐高宗天皇大帝

則天皇后

中宗孝和皇帝

睿宗玄真皇帝

高宗天皇大帝

唐書曰高宗天皇帝諱治太宗第九子也母曰文德順聖皇后長孫氏以貞觀二年六月生於東宮之麗正殿五年封晉王七年遙授并州都督幼而岐嶷端審寬仁孝友初授孝經於著作郎蕭德言太宗問曰此書中何言為善對曰夫孝始於事親中於事君終於立身君子之事上也進思盡忠退思補過將順其美匡救其惡太宗悅曰行此足以事父兄為臣子矣及文德皇后崩晉王時年九歲哀慕感動左右太宗屢加慰撫由是特深寵異尋拜右武衛大

將軍十七年皇太子承乾廢魏王泰亦以罪黜太宗與長孫无忌房玄齡李世勣等計議立晉王為皇太子太宗每視朝常令在側觀決庶政或令參議太宗數稱其善十八年太宗將伐高麗命太子留鎮定州及駕發有期悲啼累日因請飛驛遞表起居并遞勅垂報並許之及軍旋太子從至并州時太宗患癰太子親吮祖亮切之扶輦步從數日二十三年五月己巳太宗崩六月甲戌皇太子即皇帝位時年二十二詔大赦天下内外文武賜勳官一級永徽元年春正月辛丑朔上不受朝詔改元景午立妃王氏為皇后二年春正月戊戌詔日去歲闕輔之地頗弊蝗螟音天下諸州或遭水旱百姓之間致有罄乏此由朕之不德兆庶何辜矜物罪已載深憂惕今獻歲肇春東作方始糧廩或空事資賑給其遭蟲水處有貧乏者量以正義倉賑貸

五年春三月戊午幸萬年宮辛未曲赦所經州縣繫囚以工部尚書闕立德領丁夫四萬築長安羅郭八月大理奏決死囚摠有七十餘人六年九月庚午尚書右僕射褚遂良以諫立武昭儀貶授潭州都督乙酉洛州大水毀天津橋冬十月己酉廢皇后王氏為庶人立昭儀武氏為皇后大赦天下七年正月辛未廢皇太子忠為梁王立代王弘為皇太子壬申大赦改元為顯慶元年五月己卯太尉長孫無忌進史館所撰梁陳周齊隋五代史志三十卷五年八月庚辰蘇定方等討平百濟面縛其王扶餘義慈國分為五部郡三十七城二百戶七十六萬以其地分置熊津等五都督府麟德元年三月辛亥展大射禮十二月景戌殺西臺侍郎上官儀戊子庶人忠坐與儀交通賜死二年十月司禮太常伯劉祥道上疏請封禪癸亥高麗王高藏

遣其子福男來朝丁卯將封泰山發自東都是歲大稔米
斗五錢麩音麥不列于市麟德三年春正月戊辰朔車駕
至泰山頓是日親祀昊天上帝於封祀壇以高祖太宗配
饗己巳帝昇山行封禪之禮庚午禪於社首祭皇地祇以
太穆太皇太后文德皇太后配饗皇后爲亞獻越國太妃
燕氏爲終獻辛未御降禪壇壬申御朝觀壇受朝賀改麟
德三年爲乾封元年正月景戌發自泰山甲午次曲阜縣
幸孔子廟追贈太師增修祠宇以少牢致祭其褒聖侯德
倫子孫並免賦役二月己未次亳州幸老君廟追號曰太
上玄元皇帝創造祠堂改谷陽縣爲真源縣縣內宗姓特
給復一年夏四月甲辰車駕至自泰山先謁太廟而後入
庚寅改鑄乾封泉寶錢冬十月己酉司空英國公勣爲遼
東道行軍大總管以伐高麗三年二月戊寅以明堂制度

歷代不同漢魏以還彌更訛舛遂增損古今新制其圖下
詔大赦改元爲總章元年二月戊寅幸九成宮九月癸巳
司空英國公勣破高麗拔平壤城擒其王高藏及其大臣
男建等以歸境內盡降其城一百七十上元二年三月丁
巳天后親蠶於邙山之陽時帝風疹不能聽朝政事皆決
於天后自誅上官儀後上每視朝天后垂簾於御座後政
事大小皆預聞之內外稱爲二聖帝欲下詔令天后攝國
政中書侍郎郝處俊諫止之調露元年十月單于大都護
府突厥阿史德溫傳及奉職二部相率反叛二年八月甲
子廢皇太子賢爲庶人幽於別所乙丑立英王哲爲皇太
子改調露二年爲永隆元年大赦天下二年閏七月庚申
上以服餌令皇太子監國景寅雍州大風害稼米價翔踊
是月裴行儉大破突厥史伏念之衆伏念爲程務挺急追

太平御覽 卷一百一十 三
來降行儉於是盡平突厥餘黨行儉執伏念振旅凱旋永
淳二年春正月甲午朔幸奉天宮遣使祭嵩嶽少室箕山
具茨等山西王母啓母巢父許由等祠十一月丁未自奉
天宮還東都上疾甚宰臣已下並不得謁見十二月丁巳
詔改永淳二年爲弘道元年將宣赦書上欲親御則天門
樓氣逆不能上馬遂召百姓於殿前宣之禮畢上問侍臣
曰民庶喜否曰百姓蒙赦無不感悅上曰蒼生雖喜我命
危篤天地神祇若延吾一兩月之命得還長安死亦無恨
是夕帝崩於貞觀殿時年五十六謚曰天皇帝廟號高
宗文明元年八月葬于乾陵天寶十三載改謚曰天皇帝
弘孝皇帝

則天皇后

唐書曰則天皇后武氏諱曌并州文水人也父士彥

曼縛切

隋大業末爲鷹揚府隊正高祖行軍於汾晉每休止其家
義旗初起從平京城貞觀中累遷工部尚書荊州都督封
應國公初則天年十四時太宗聞其美容止召入宮立爲
才人及太宗崩遂爲尼居感業寺大帝於寺見之復召入
宮拜昭儀時皇后王氏良娣蕭氏頻與武昭儀爭寵互讒
毀之帝皆不納進號宸妃永徽六年廢王皇后而立武宸
妃爲皇后高宗稱天皇帝武后亦稱天后后素多智計兼涉
文史帝自顯慶已後多苦風疾百司表奏皆委天后詳決
自此內輔國政數十年威勢與帝無異當時稱爲二聖弘
道元年十二月大帝崩皇太子顯即位尊天后爲皇太后
既將篡奪是日自臨朝稱制嗣聖元年春正月甲申朔改
元二月戊午廢皇帝爲廬陵王幽于別所仍改名哲己未
立豫王輪爲皇帝令居於別殿大赦天下改爲文明皇太

后仍臨朝稱制庚申廢皇太孫重照為庶人九月柳州司馬徐敬業殺楊州長史陳敬之舉兵移檄天下左玉鈐衛大將軍李孝逸討平之垂拱四年五月皇太后加尊號曰聖母神皇秋七月大赦天下八月壬寅博州刺史瑯耶王冲據博州起兵命左金吾大將軍丘神勣為行軍總管討之庚戌冲父豫州刺史越王貞又舉兵與冲相應九月命內史岑長倩鳳閣侍郎張光輔左監門大將軍麴崇裕率兵討之景寅斬貞及冲等傳首神都改姓為虺音并氏曲赦博州韓王元嘉魯王靈夔元嘉子黃國公譔音選靈夔子左散騎常侍范陽王藹霍王元軌及子江都王緒故號王元鳳子東莞音管公融坐與貞通謀元嘉靈夔自殺元軌配流黔州譔等伏誅改姓虺氏自是宗室諸王相繼誅死者殆將盡矣其子孫年幼者咸配流嶺外并誅其親黨數百餘

家載初元年春正月神皇親享明堂大赦天下依周制建子月為正月改十二月為臘月改舊正月為壹月大酺三日神皇以璽字為名遂改詔書為制書秋九月革唐命改國號為周改元為天授大赦天下乙酉加尊號為聖神皇帝降皇帝輪為皇嗣景戌立武氏七廟追尊神皇父土彥為孝明皇帝證聖元年春正月加尊號曰慈氏越古金輪聖神皇帝大赦天下改元大酺七日二月上去慈氏越古尊號秋九月親祀南郊加尊號天冊金輪聖神皇帝大赦天下改元為天冊萬歲大辟罪已下及犯十惡常赦所不原者咸赦除之大酺九日萬歲登封元年臘月甲申上登封于嵩嶽大赦天下改元大酺九日丁亥禪于少室山聖歷元年正月親享明堂大赦天下改元大酺九日三月召廬陵王哲於房州九月景子廬陵王哲為皇太子令依舊

名顯大赦天下神龍元年春正月大赦改元上不豫制自
文明元年已後得罪人除楊豫博三州及諸逆魁首咸赦
除之癸卯麟臺監張易之與弟司僕卿昌宗謀反皇太子
率左右羽林軍桓彥範岑暉等以羽林兵入禁中誅之甲
辰皇太子監國大赦天下是日上傳皇帝位于皇太子徙
居上陽宮戊申皇帝上尊號曰則天大聖皇帝冬十一月
壬寅則天將大漸遣制祔廟歸陵令去帝號稱則天大聖
皇后是日崩于洛陽宮之仙居殿年八十三謚曰則天大
聖皇后祔葬于乾陵

中宗和皇帝

唐書曰中宗和皇帝諱顯高宗第七子母曰則天順聖皇
后顯慶元年十一月生於長安明年封周王授洛州牧儀
鳳二年徙封英王改名哲授雍州牧永隆元年章懷太子

廢其年立爲皇太子弘道元年十二月高宗崩皇太子即
帝位皇太后臨朝稱制改元嗣聖元年二月皇太后廢帝
爲廬陵王幽於別所其年五月遷於均州尋徙居房陵聖
曆元年召還東都立爲皇太子依舊名顯時張易之與弟
昌宗僭圖逆亂神龍元年鳳閣侍郎張柬之鸞臺侍郎
崔玄暉音韋左羽林將軍敬暉右羽林將軍桓彥範司刑少
卿袁恕己等定策率羽林兵誅易之昌宗迎皇太子赦天
下鳳閣侍郎韋承慶正諫大夫房融司禮卿崔慶等下獄
甲辰命地官侍郎樊忱音謹往京師告陵廟乙巳則天傳位
於皇太子景午即皇帝位於通天宮大赦天下唯易之黨
與不在原限二月甲寅復國號依舊爲唐社稷宗廟陵寢
郊祀行軍旗幟服色天地日月寺宇臺閣官名並依永淳
已前故事甲子立妃韋氏爲皇后大赦天下詔九品已上

及朝集使極言朝政得失兼舉賢良方正直言極諫之士
景龍三年十一月乙丑親祀南郊皇后登壇亞獻左僕射
舒國公韋巨源爲終獻大赦天下四年五月丁卯前許州
司兵參軍燕欽融上書言皇后干預國政安樂公主武延
秀宗楚客等同危宗社帝怒召欽融庭見撲殺之時安樂
公主志欲皇后臨朝稱制而求立爲皇太女由是與后合
謀進鳩六月壬午帝遇毒崩于神龍殿年五十五秘不發
喪皇后親搃庶政立溫王重茂爲皇太子甲申發喪于太
極殿宣遺制皇太后臨朝大赦天下改元爲唐隆丁亥皇
太子即帝位時年十六皇太后韋氏臨朝稱制大赦天下
常赦所不原者咸赦除之內外兵馬令諸親王掌仍令韋
溫摠知時召諸府折衝兵五萬人分屯京城列爲左右營
諸韋子姓分統之庚子夜臨淄王諱舉兵誅諸韋諸武皆

梟首於安福門外韋太后爲亂兵所殺九月丁卯上謚曰
孝和皇帝廟號中宗葬定陵天寶十三載二月改謚曰大
聖大昭孝皇帝諱曰高宗第八子中宗母弟龍朔
二年六月己未生於長安其年封殷王遙領冀州大都督
單于大都護右金吾衛大將軍及長謙恭孝友好學工草
隸尤愛文字訓詁之書乾封元年徙封豫王總章二年徙
封翼王上初名旭輪至是去旭字上元二年徙封相王拜
右衛大將軍儀鳳三年遷洛州牧改名旦徙封豫王嗣聖
元年則天臨朝廢中宗爲廬陵王立豫王爲皇帝仍臨朝
稱制及革命改國號爲周降帝爲皇嗣令依舊名輪徙居
東宮其儀一比皇太子聖曆元年中宗自房陵還帝數稱

疾不朝請讓位於中宗則天遂立中宗爲皇太子封帝爲相王又改名旦授太子右衛率長安中拜司徒右羽林衛大將軍自則天初臨朝及革命之際王室屢有變故帝每恭險退讓竟免于禍神龍元年以誅張易之兄弟功進號安國相王遷太尉加實封其年立爲皇太弟固辭不受景龍四年夏六月中宗崩韋庶人臨朝引用其黨分握政柄忌帝望實素高潛謀危害庚子夜臨淄王與太平公主子薛崇簡前朝邑尉劉幽求長上果毅麻嗣宗宮苑摠監鍾紹京等率兵入北軍誅韋溫紀處訥宗楚客武延秀馬秦客葉靜能趙履溫楊均等諸韋武黨與皆誅之辛丑帝挾少主御安福門樓慰諭百姓大赦天下其日王公百寮上表咸以國家多難宜立長君以帝衆望所歸請即尊位甲辰少帝詔曰叔父相王高宗之子昔以天下讓于先帝孝

友寬簡彰信兆人神龍之初已有明旨將立太弟以爲嗣君爲王懇辭未行冊命所以東宮虛位至于歷年撤綴涉切在辰禍變倉卒然後稱制計立冲人欽奉前懷願遵理命上申先聖之旨下遂蒼生之心俯稽圖緯之文仰峻祖宗之烈起今日請叔父相王卽皇帝位朕退守本藩歸于舊邸凡百卿士敬承朕言克贊我天人之休期光我有唐之勳業布告遐邇咸使聞知相王上表讓曰臣以宗社事重國家情深誅鋤巨逆奉戴嗣主今承制旨猥推宸極在臣虛薄不敢祇膺循環震驚無任感哽制荅曰皇極大寶天下至公王者臨之蓋非獲已王先聖舊意蒼生推仰龍光紫宸實允係望請遵前旨勿或讓推於是少帝遜于別宮是日卽皇帝位御承天門樓大赦天下景雲三年春正月辛未朔親謁太廟癸酉上始釋慘切七慘服御正殿受朝

賀甲戌并汾絳三州地震壞人廬舍辛巳親祀南郊戊子躬耕籍田己丑大赦天下改元爲太極二月丁亥皇太子釋奠於國學追贈顏回爲太子太師曾參爲太子太保每年春秋釋奠以四科弟子及曾參從祀列于二十三賢之上八月庚子帝傳位于皇太子自稱曰太上皇帝五日一受朝于太極殿自稱曰朕三品已上除授及六刑獄並自決之其處分事稱誥令皇帝每日受朝於武德殿自稱曰予三品已下除授及徒罪並令決之其處分事稱制初甲辰大赦天下改元爲先天二年秋七月甲子太平公主與左僕射竇懷貞侍中岑羲等謀逆事覺皇帝率兵誅之窮其黨與太子少保薛稷左散騎常侍賈膺福右羽林將軍李慈李欽中書舍人李猷中書令崔湜尚書左丞廬藏用太史令傅孝忠僧惠範等皆誅之兵部尚書郭元振從上

御承天門樓大赦天下自大辟罪已下無輕重咸赦除之翌日太上皇諱曰朕將高居無爲自今後軍國刑政一事已上並取皇帝處分開元四年夏六月甲子太上皇帝崩于百福殿時年五十五謚曰大聖眞皇帝廟曰睿宗冬十月葬于橋陵天寶十三載改謚曰至眞大聖人興孝皇帝

太平御覽卷第一百一十

太平御覽卷第一百一十一
 皇王部三十六
 玄宗明皇帝
 安祿山附
 唐書曰玄宗明皇帝諱隆基睿宗第三子也母曰昭成順
 聖皇后竇氏垂拱元年秋八月戊寅生於東都性英斷多
 藝尤知音律善八分書儀範偉麗有非常之表三年閏七
 月丁卯封楚王天授二年十月戊戌出閣開府置官屬年
 始七歲朔望車騎至朝堂金吾將軍武懿宗忌上嚴整訶
 排儀仗因欲折之上叱之曰吾家朝堂干汝何事敢迫吾
 騎從則天聞而特加寵異尋却入閣長壽二年臘月丁卯
 改封臨淄郡王聖曆元年出閣賜第於東都積善坊大定
 元年從幸西京賜宅於興慶坊長安中歷右衛郎將尚輦
 奉御神龍元年遷衛尉少卿景龍二年四月兼潞州別駕

太平御覽卷第一百一十一

皇王部三十六

玄宗明皇帝

安祿山附

唐書曰玄宗明皇帝諱隆基睿宗第三子也母曰昭成順
 聖皇后竇氏垂拱元年秋八月戊寅生於東都性英斷多
 藝尤知音律善八分書儀範偉麗有非常之表三年閏七
 月丁卯封楚王天授二年十月戊戌出閣開府置官屬年
 始七歲朔望車騎至朝堂金吾將軍武懿宗忌上嚴整訶
 排儀仗因欲折之上叱之曰吾家朝堂干汝何事敢迫吾
 騎從則天聞而特加寵異尋却入閣長壽二年臘月丁卯
 改封臨淄郡王聖曆元年出閣賜第於東都積善坊大定
 元年從幸西京賜宅於興慶坊長安中歷右衛郎將尚輦
 奉御神龍元年遷衛尉少卿景龍二年四月兼潞州別駕

十二月州境有黃龍白日昇天嘗出畝有紫雲在其上後從者望而得之前後符瑞凡一十九事四年中宗將祀南郊來朝京師將行使術士韓禮筮之著一莖子然獨立禮驚曰著立奇瑞非常也不可言屬中宗末年王室多故上常陰引材力之士以自助上所居宅外有水池浸溢頃餘望氣者以爲龍氣四月中宗幸其第因遊其池結綵爲樓船令巨象蹈之至六月中宗暴崩韋后臨朝稱制韋溫宗楚客紀處訥等謀傾宗社以睿宗介弟之重先謀不利道士馮道力處士劉承祖皆善占兆詣上布誠款上所居里名隆慶時人語訛以隆爲龍韋庶人稱制改元又爲唐隆皆符御名上益自負乃與太平公主謀之公主喜以子崇簡從上乃與崇簡朝邑尉劉幽求長上折衝麻嗣宗押萬騎果毅葛福順李仙臯寶昌寺僧普潤等定策誅之或曰

先啓大王上曰我拯社稷之危赴君父之急事成福歸於宗社不成身死於忠孝安可先請憂怖大王乎若請而從是王與危事請而不從則吾計失矣遂以庚子夜率幽求等數十人自苑南入總監鍾紹京又率丁匠百餘人以從分遣萬騎往立武門殺羽林將軍韋璿韋播高嵩持首而至衆驩叫大集攻白獸玄德等門斬關而進左萬騎自左入右萬騎自右入合於凌烟閣前時太極殿前有宿衛梓宮萬騎聞譟聲皆被甲應之韋庶人惶惑走入飛騎營爲亂兵所害於是分遣誅韋氏之黨比明內外討捕皆斬之乃馳謁睿宗謝不先啓請之罪睿宗遽前抱上而泣曰宗社禍難由汝安定神祇萬姓賴汝之力也拜殿中監同中書門下三品兼押左右萬騎進封平王睿宗卽位與侍臣議立皇太子僉曰除天下之禍者享天下之福拯天下之

危者受天下之安平王有聖德定天下又聞成器已下咸有推讓宜膺主鬯以副羣心睿宗從之景午制立爲皇太子延和元年凶黨因術人閒睿宗曰據玄象帝座及前星有災皇太子合作天子不合更居東宮矣睿宗曰傳德避災吾意決矣七月壬午下制曰皇太子某有大功於天地定阼危於社稷溫文旣習聖敬克躋委之監撫已移年歲時政益明庶工惟序朕之知子庶不負時曆數在躬宜陟元后可令卽皇帝位有司擇日授冊朕方比迹洪古希風太皇神與化遊思與道合無爲無事豈不美歟王公百寮宜識朕意上惶懼遽馳見叩頭請所以傳位之旨睿宗曰吾因汝功業得宗社今帝座有肯思欲遜避唯盛德大勳始轉禍爲福易位於汝吾知免矣上始居武德殿視事三品已下除授及徒罪皆決之先天二年七月三日尙書左

僕射竇懷貞侍中岑義中書令蕭至忠崔湜雍州長史李晉左羽林大將軍常元楷知羽林將軍李慈等與太平公主同謀期以其月四日以羽林兵作亂上密知之因以中旨告岐王範薛王業兵部尙書郭元振將軍王毛仲少監姜皎中書侍郎王琚吏部侍郎崔日用等定計因毛仲取閑廐馬及家人三百餘人率太僕少卿李令問王守一內侍高力士果毅李守德等親信十數人出武德殿入虔化門梟常元楷李慈於北闕擒賈膺福李猷於內客省以出執蕭至忠岑義於朝堂皆斬之睿宗明日下詔曰朕將高居無爲自今軍國刑政一事已上並取皇帝處分上御承天門樓下制大赦天下冬十一月甲申幸新豐之温湯癸卯講武於驪山兵部尙書代國公郭元振坐虧失軍容配流新州給事中攝太常少卿唐紹以軍禮有失斬於纛下

甲辰畋獵于渭川同州刺史梁國公姚元之爲兵部尙書同中書門下三品十一月戊子上加尊號爲開元神武皇帝十二月庚寅朔大赦天下改元爲開元四年六月癸亥太上皇崩九年四月甲戌上親策試應制舉人於含元殿謂曰古有三道今減二策近無甲科朕將存其上第務收賢俊十三年冬十月辛酉東封泰山發自東都十一月丙戌至兗州岱宗頓丁亥致齋於行宮己丑日南至備法駕登山仗衛羅列嶽下百餘里詔行從留於谷口上與宰臣禮官昇山庚寅祀昊天上帝於上壇有司祀五帝百神于下壇禮畢藏玉冊於封祀壇之石礧然後燔柴燎發群臣稱萬歲傳呼自山頂至嶽下震動山谷上還齋宮慶雲見日抱戴辛卯祀皇地祇于社首藏玉冊於石礧如封祀壇之禮壬辰御帳殿受朝賀大赦天下封太山神爲天齊王

禮秩加三公一等環山十里禁其樵採賜醪七日甲午發岱嶽景申幸孔子宅親設奠祭十二月己巳至東都時累歲豐稔東都米斛十錢青齊米斛五錢是冬分吏部爲銓勅禮部尙書蘇頌刑部尙書韋抗工部尙書盧從愿等分掌選事十四年五月癸卯戶部進計帳今年管戶七百六萬九千五百六十五管口四千一百四十一萬九千七百一十三二十二年五月關中大風拔木同州尤甚是夏上自於苑中種麥率皇太子已下躬自收穫謂太子等曰此將薦宗廟是以躬親亦欲令汝等知稼穡之難也因分賜侍臣謂曰比歲令人巡檢苗稼所對多不實故自種植以觀其成且春秋書麥禾豈非古人所重也二十五年春正月壬午制曰朕猥集休運多謝哲王然而哀矜之情小大必慎自臨寰宇子育蒸黎未嘗行極刑起大獄上玄降鑒

應以祥和思叶平邦之典致之仁壽之域自今有犯死刑除十惡罪宜令中書門下與法官詳所犯輕重具狀奏聞秋七月己卯大理少卿徐祐奏天下今歲斷死刑五十八幾致刑措二十七年八月甲申制追贈孔宣父爲文宣王顏回爲兗國公餘十哲皆爲侯夾坐後嗣衰聖侯改封爲文宣公二十九年正月制兩京諸州各置玄宗皇帝廟并置崇玄學天寶元年春正月丁未朔大赦天下改元常赦不原咸赦除之百姓有欠負租稅及諸色並免之前資官及自身人有儒學博通文詞秀逸及軍謀武藝者所在具以名薦京文武官才堪爲刺史者各令封狀自舉改黃鉞爲金鉞內外官各賜勳兩轉甲寅陳王府參軍田同秀上言玄宗皇帝降見于丹鳳之通衢告錫靈符在尹喜之故宅上遣使就函谷故關尹喜臺西發得之乃置玄宗廟於

大寧坊二月丁亥上加尊號爲開元天寶聖文神武皇帝辛卯親享玄宗皇帝于新廟甲午親享太廟景申合祭天地于南郊制天下囚徒罪無輕重並釋放三載正月景辰朔改年爲載四載秋八月甲辰冊太真妃楊氏爲貴妃七載三月乙酉大同殿柱產玉芝有神光照殿羣臣請加皇帝尊號日開元天寶聖文神武應道許之夏五月壬午上御興慶宮受冊徽號大赦天下六月范陽節度使安祿山賜實封及鐵券十一載十一月庚申御史大夫兼蜀郡長史楊國忠爲右相兼吏部尚書十三載二月祿山奏前後討奚契丹立功將士跳盪等請超三資於是超授將軍者五百餘人中郎將者二千餘人十四載冬十月壬辰幸華清宮景寅范陽節度使安祿山率藩漢之兵十餘萬自幽州南向指闕以誅楊國忠爲名先殺太原尹楊光翹於博

陵郡壬申聞於行在所癸酉以郭子儀爲靈武太守朔方節度使封常清自安西入奏至行在甲戌以常清爲范陽平盧節度使令募兵三萬以禦逆胡戊寅還京十二月景戌朔祿山於靈昌郡渡河辛卯陷陳留郡殺張介然甲午陷滎陽郡殺太守崔無詖景申封常清與賊戰于成臯豐子谷官軍敗績常清奔于陝郡丁酉祿山陷東京殺留守李愷中丞盧奕判官蔣清時高仙芝鎮陝郡棄城西保潼關常山太守顏杲卿與長史表履謙賈深等殺賊將李欽湊執賊將何千年高邈送京師辛丑詔皇太子統兵東討十五載春正月乙卯御宣政殿受朝其日祿山僭號於東京六月庚寅哥舒翰將兵入萬與賊將崔乾祐戰于靈寶西原官軍大敗死者十六七甲午將謀幸蜀乃下詔親征仗下後士庶恐駭奔走于路乙未凌晨自延秋門出微雨

霑濕扈從唯宰相楊國忠韋見素內侍高力士太子親王妃主皇孫已下多從之不及平明渡便橋國忠欲斷橋上日後來者何以能濟命緩之辰時至咸陽望賢驛置頓官吏駭散無復儲擬上憩於宮門之樹下亭午未進食俄有老父獻麩上謂之曰爾可進飢於是百姓獻食相繼俄又尚食持御膳至上頒給從官而後食是夕次金城縣官吏已遁令魏方進男允招誘俄得智藏寺僧進荔粟行從方給景辰次馬嵬驛諸衛頓軍不進龍武大將軍陳玄禮奏曰逆胡指闕以誅國忠爲名然中外羣情不無嫌怨今國步艱阻乘輿震蕩陛下宜徇羣情爲社稷大計國忠之徒可致之於法會吐蕃使二十一人遮國忠告訴於驛門衆即呼曰楊國忠連蕃人謀逆兵士圍驛四合乃誅楊國忠魏方進一族兵猶未解上令高力士詰之迴奏曰諸將既

誅國忠以貴妃在宮人情恐懼上卽命力士賜貴妃自盡
玄禮等見上請罪命釋之丁酉將發馬嵬驛朝臣唯韋見
素一人乃命見素子京兆府司錄諤爲御史中丞充置頓
使議其所向軍士或言河隴或言靈武太原或言還京爲
便韋諤曰還京須有捍賊之備兵馬未集恐非萬全不如
且幸扶風徐圖所向上詢于衆衆以爲然及行百姓遮路
乞留皇太子願戮力破賊收復京城卽日留太子戊戌次
扶風縣己亥次扶風郡軍士各懷去就咸出醜言陳玄禮
不能制會益州貢春綵十萬匹上悉命置于庭召諸將諭
之曰卿等國家功臣陳力久矣朕之優獎常亦不輕逆胡
背恩事須迴避甚知卿等不得別父母妻子朕亦不及親
辭九廟言發涕流又曰朕須幸蜀路險狹人若多往恐難
供奉今有此綵卿等卽宣分取各圖去就朕自有子弟中

官相隨便與卿等訣別衆咸俯伏涕泣曰死生願從陛下
帝曰去住任卿自是悖亂之言稍息庚子以司勳郎中劔
南節度留後崔圓爲蜀郡長史劔南節度副大使以穎王
璪爲劔南節度大使以監察御史宋若思爲御史中丞充
置頓使韋諤充巡閣道使並令先發辛丑發扶風郡是夕
次陳倉壬寅次散關分部下爲六軍穎王璪先行壽王瑁
等分統六軍前後左右相次景午次河池郡崔圓奏劔南
歲稔民安儲供無闕上悅授圓中書侍郎同中書門下平
章事蜀郡長史劔南節度如故以前華州刺史魏仲犀爲
梁州長史秋七月壬戌次益昌縣渡吉柏江有雙魚夾舟
而躍議者以爲龍甲子次普安郡憲部侍郎房瑄自後至
上與語甚悅卽日拜爲吏部尚書同中書門下平章事丁
卯詔以皇太子諱充天下兵馬元帥都統朔方河東河北

平盧等節度兵馬收復兩京庚午次巴西郡庚辰車駕至蜀郡扈從官吏軍士到者一千三百人宮女二十四人而已八月癸未朔御蜀郡府衙宣詔大赦天下癸巳靈武使至始知皇太子卽位丁酉上用靈武冊稱上皇詔稱諡己亥上皇臨軒降冊肅宗命宰臣韋見素房瑁使靈武冊命曰朕稱太上皇軍國大事先取皇帝處分後奏朕知俟克復兩京朕當怡神姑射偃息大庭明年九月郭子儀收復兩京十月肅宗遣中使啖廷瑤入蜀奉迎丁卯上皇發蜀郡十一月景申次鳳翔郡肅宗遣精騎三千至扶風迎衛之南樓肅宗拜慶樓下嗚咽流涕不自勝爲上皇徒步控轡上皇撫背止之卽騎馬前導丁未至京師文武百寮京城士庶夾道歡呼靡不流涕卽日御大明宮之含元殿見

百寮上皇親自撫問人人感咽上皇謁廟請罪遂幸興慶宮三載二月肅宗與羣臣奉上皇尊號曰太上至道聖皇帝乾元三年七月丁未移幸西內之甘露殿時闔官李輔國離間肅宗故移居西內高力士陳玄禮等遷謫上皇寢不憚上元二年四月甲寅崩于神龍殿時年七十八謚曰至道大聖大明孝皇帝廟號玄宗初上皇親拜五陵至橋陵見金粟山崗有龍盤鳳翥之勢復近先塋謂侍臣曰吾千秋後宜葬此地得奉先陵不忘孝敬矣至是追奉先旨以創寢園廣德元年三月辛酉葬泰陵

安祿山附

唐書安祿山營州柳城雜種胡人也本無姓名軋犖山母阿史德氏亦突厥巫師以卜爲業開元初與將軍安道買男俱逃出突厥中道買次男貞節爲嵐州別駕收獲之

年十餘歲矣冒姓爲安及長解六蕃語二十年張守珪爲幽州節度祿山盜羊事覺守珪剝坐欲棒殺之大呼曰大夫不欲滅兩蕃耶何爲打殺祿山守珪見其肥白壯其言而釋之令與鄉人史思明同捉生行必尅獲拔爲偏將以驍勇聞遂養爲子二十八年爲平盧兵馬使性巧密人多譽之授營州都督平盧軍使厚賂往來者乞爲好言玄宗益信嚮之天寶元年以平盧軍爲節度以祿山攝中丞爲使入朝奏事玄宗益寵之三載代裴寬爲范陽節度河北採訪平盧軍等使如故採訪使張利貞嘗受其賂及李林甫並言其美玄宗意益堅後請爲貴妃養兒入對皆先拜太真玄宗恠問之對曰臣是蕃人先母而後父玄宗大悅遂命楊銛已下並約爲兄弟姊妹晚年益肥壯垂手過膝重三百三十斤每行以肩膊左右擡挽其身方能移步至

玄宗前作胡旋舞疾如風焉爲置第宇窮極壯麗上御勤政樓於御坐東爲設一大金雞障前置一榻坐之十載入朝又求爲河東節度因拜之長子慶宗大僕卿少子慶緒鴻臚卿慶宗又尙郡主祿山陰有逆謀於范陽北築雄武城外示禦寇內貯兵器積穀爲保守之計戰馬萬五千匹牛羊稱是兼三節度進奏無不允每月進奉生口駝馬鷹犬旣肥大不任戰十一載八月祿山併率河東等軍十五萬以討契丹去平盧千餘里至土護真河卽北黃河也倍程奄至契丹牙帳屬久雨弓箭皆漲濕將士困極奚又夾攻之殺傷略盡祿山被射以麾下奚小兒二十餘人走上山墜坑中其男慶緒等扶之會夜解走投平盧城楊國忠屢奏祿山必反玄宗使中官輔璆琳覘之得其賄賂盛言其忠十三載正月謁於華清宮因涕泣言臣蕃人不識字

六平雜覽 卷一百一十一 九
陛下擢臣不次被楊國忠欲得殺臣玄宗益親厚之遂以
爲左僕射却迴又請爲閑廐隴右羣牧等都使又請知總
監事既爲閑廐羣牧等使上筋脚馬皆陰選擇之三月歸
范陽疾行出關日三四百里至范陽人言反者玄宗必大
怒縛送與之十四載十一月反於范陽矯稱奉恩命以兵
討逆賊楊國忠以諸蕃馬步十五萬以高尙嚴莊爲謀主
孫孝哲高邈何千年爲腹心天下承平日久人不知戰聞
其兵起朝廷震驚禁衛皆市井商販之人乃以高仙芝封
常清等擊之祿山又嚴肅得土死力無不一當百遇之必
敗十二月渡河遂入陳留郡太守郭納出降至滎陽太守
崔無詖拒戰城陷死之次于汜水鬻子谷乃取谷南而過
東京留守李愷中丞盧奕使採訪判官蔣清燒絕河陽橋
祿山入東京殺李蒞盧奕蔣清召河南尹達奚珣使之愷

十五載正月賊竊號燕國年號聖武達奚珣已下署爲將
相五月南陽節度魯炅率荆襄黔中嶺南子弟十萬與賊
將武令珣戰于葉縣城北潢河王師盡沒六月李光弼郭
子儀出土門路大破賊衆於常山郡東嘉山河北諸郡歸
順者十餘祿山窘急圖欲却投范陽會哥舒翰自潼關領
馬步八萬與賊將崔乾祐戰于靈寶西爲賊覆敗翰西奔
潼關爲其帳下執送于賊關門不守玄宗幸蜀十一月遣
阿史那承慶攻陷潁川屠之祿山以體肥及造逆後兩眼
漸暗至是不見物又著疽疾至德二載正月朔受朝瘡甚
而中罷尤躁急動用斧鉞嚴莊亦被捶撻莊謀立慶緒領
豎李豬兒同入祿山帳中豬兒以大刀斫其腹祿山眼無
所見捫床頭刀不得但撼幄帳中大呼曰是我家賊腸已
數斗流在床上言訖氣絕莊即宣言於外言祿山傳位於

晉王慶緒縱樂飲酒無度呼莊爲兄事之小大必咨之慶緒爲僞主素懦精神言詞無序二月肅宗南幸鳳翔郡始知祿山死使僕固懷恩使于迴紇結婚請兵討逆九月廣平王領蕃漢之衆收西京走安守忠賊之死者積如山阜王師乘勝至陝郡賊懼令嚴莊傾其驍勇而來拒廣平王遣副元帥郭子儀等與賊戰于陝西曲沃大破之斬首十餘萬嚴莊奔至東京告慶緒慶緒率其餘衆奔河北保鄴郡嚴莊至河內南來歸順賊將阿史那承慶等麾下三萬餘衆悉奔恒趙范陽從慶緒者唯疲卒一千騎三百而已乾元元年九月肅宗遣郭子儀等九節度率步騎二十萬以攻之于儀使善射者三千人伏於壘垣內明日接戰子儀麾其屬僞奔慶緒逐之伏者齊發賊軍大潰使薛嵩求救於史思明言禪讓之禮思明先遣李歸仁以步騎一萬

馬軍三千先往滏陽以應之及至滏陽子儀之圍已固築城穿壕各三重引水以灌城下思明南攻魏州節度使崔光遠南走思明據其城乾元二年正月思明僞稱燕王慶緒自十月被圍至二月城中人相食思明引衆來救三月子儀等戰敗遂解圍而南斷河陽橋以守穀水思明領其衆營於鄴縣南慶緒使收子儀等營中糧尙六七萬石張通儒高尙平列謂慶緒曰史王遠來臣等皆合迎謝對曰任公暫往見思明明與之涕泗厚其禮復令歸城經三日慶緒以三百騎詣思明明引入令三軍擐甲執兵付之及諸弟領至于庭再拜稽首曰臣不克負荷弃失兩都久陷重圍不意大王以太上皇之故將兵遠救思明日奔失兩都用兵不利亦何事也爾爲人子殺汝父以求位庸非大逆乎吾爲大上皇討賊卽牽出并其四弟及高尚孫

表非常雅類聖祖此社稷之福也二十年諸將大破奚契丹以上遙統之功加司徒二十三年改名璵後皇太子瑛得罪立上爲皇太子天寶十三載正月安祿山來朝上嘗密奏云祿山有反相玄宗不聽十四載十一月祿山果叛十二月丁未陷東京辛丑制太子監國仍遣上親總諸軍進討時祿山以誅楊國忠爲名由是軍民切齒於楊氏國忠懼乃與貴妃謀閒其事上遂不行乃詔河西節度哥舒翰爲皇太子前鋒兵馬元帥令率衆二十萬守潼關明年六月哥舒翰爲賊所敗關門不守玄宗幸蜀丁酉至馬嵬頓兵軍不進請誅楊氏於是誅國忠賜貴妃自盡車駕將發留上在後宣諭百姓衆泣而言曰逆胡背恩主上播越臣等生於聖代世爲唐民願勦力一心爲國討賊請從太子收復長安玄宗聞之曰此天啓也乃令高力士與壽王

瑁送太子內人及服御等物留後軍廐馬從上令力士口宣曰汝好去百姓屬望慎勿違之莫以吾爲意且西戎北狄吾嘗厚之今國步艱難必得其用汝其勉之上迴至渭北便橋已斷水暴漲無舟楫上號令水濱百姓歸者三千餘人渭水可涉又遇潼關散卒誤以爲賊與之戰士衆多傷乃收其餘衆以北上軍旣濟後者皆溺上喜以爲天之睠佑時從上唯廣平建寧二王及四軍將士纔二千人自奉天而北夕次永壽百姓遮道獻牛酒有白雲起西北長數丈如樓閣之狀議者以爲天子氣戍戍至新平郡時晝夜奔馳三百餘里士衆器械亡失過半所存之衆不過一旅時賊據長安知上治兵河西三輔百姓皆曰吾太子大軍卽至賊望西北塵起有時奔走七月辛酉上至靈武時魏少遊預備供帳無不畢備裴冕杜鴻漸等從容進曰今

寇逆亂常毒流函谷主上倦勤大位移幸蜀川江山阻脩
奏請路絕宗社神器須有所歸萬姓顛顛思崇明聖天意
人事不可固違伏願殿下順其樂推以安社稷王者之大
孝也上曰俟平寇逆奉迎鑾輿從容儲闈侍膳左右豈不
樂哉公等何怱怱也冕等凡六上牋辭情激切上不獲已
而從之是月甲子上即皇帝位於靈武即日奏上皇是日
御靈武南門下制大赦天下改元曰至德以朔方度支副
使大理司直杜鴻漸爲兵部郎中朔方節度判官崔漪爲
吏部郎中並知中書舍人事以御史中丞裴冕爲中書侍
郎同中書門下平章事改靈武郡爲大都督府癸巳上所
奉表始達成都丁酉上皇遜位稱誥遣左相韋見素吏部
尚書房瑄門下侍郎崔渙等奉冊書赴靈武九月戊辰上
南幸彭原郡景子至順化郡韋見素房瑄崔渙等自蜀郡

賈上冊書及傳國寶等至上素知房瑄名至是瑄請爲兵
馬元帥收復兩京許之二載春正月庚戌朔上在彭原受
朝賀是日通表入蜀賀上皇上皇遣平章事崔圓奉誥赴
彭原乙卯逆胡安祿山爲其子慶緒所殺九月持四節與
迴紇葉護太子卒兵四千助國討賊葉護入見宴賜加等
丁亥元帥廣平王統朔方安西迴紇南蠻大食之衆二十
萬東向討賊壬寅與賊將安守忠李歸仁等戰於香積寺
西北賊軍大敗斬首六萬級賊帥張通儒奔京城東走癸
卯廣平王收西京甲辰捷書至行在即日告捷於蜀上皇
遣裴冕入京啓告郊廟社稷冬十月癸丑賊賊尹子琦陷
睢陽害張巡姚訥執許遠賊自香積之敗悉衆保陝郡廣
平王統郭子儀等進攻與賊戰於陝西之新店賊衆大敗
斬首十萬級橫屍三十里庚申安慶緒與其黨奔河北壬

太平御覽 卷一百一十一
三
戊廣平王入東京陳兵天津橋南士庶歡呼路側陷賊官
僞署侍中陳希烈等三百餘人素服待罪癸亥上自鳳翔
還京仍遣太子太師韋見素入蜀迎上皇鳳翔郡給復五
載景寅至望賢宮得東京捷書至上大喜丁卯入長安土
庶涕泣拜抃日不圖復見吾君上亦爲之感惻九廟爲賊
所焚上素服哭於廟三日入居大明宮十二月景午上皇
至自蜀上至望賢宮奉迎上皇御宮南樓上望樓辟易下
馬趨進樓前再拜蹈舞稱慶上皇下樓上匍匐捧上皇足
涕泗嗚咽不能自勝遂扶侍上皇御殿親自進食自試御
馬以進又躬攏轡而行止之後退上皇曰吾享國長久吾
不知貴見吾子爲天子吾知貴矣上乘馬前道自開遠門
至丹鳳門旗幟燭天綵棚夾道士庶舞抃路側皆曰不圖
今日再見二聖百寮班於含元殿庭上皇御殿左相苗晉

卿率百辟稱賀人人無不感咽禮畢上皇詣長樂殿謁九
廟神主即日幸興慶宮上請歸東宮上皇遣高力士再三
慰譬而止三載正月甲戌朔戊寅上皇御宣政殿冊皇帝
尊號曰光天文武大聖孝感皇帝乙巳上御興慶宮奉冊
上皇徽號曰太上至道聖皇大帝丁未御明鳳門大赦天
下改至德三載爲乾元元年二年九月庚寅逆胡史思明
陷洛陽副元帥李光弼守河陽汝鄭滑等州陷賊三年閏
四月朔彗出西方其長數丈己卯以星文變異上御明鳳
門大赦天下改乾元爲上元追封周太公望爲武成王依
文宣王例置廟時大霧自四月雨至閏月末不止米價翔
貴人相食饑死者委骸於路二年三月甲子史朝義率衆
夜襲我陝州衛伯玉逆擊敗之戊戌史思明爲其子朝義
所殺九月壬午制自今已後朕號唯稱皇帝其年號但稱

元年去上元之號其以今年十一月爲歲首便數建丑建寅每月以所建爲數建卯月辛亥朔上御明鳳門大赦以京兆府爲上都河南府爲東都鳳翔爲西都江陵爲南都太原爲北都建巳月庚戌朔壬子楚州刺史崔旆表獻定國寶玉十三枚甲寅太上皇崩於西內神龍殿上自仲春不豫聞上皇登遐不勝哀悽因茲大漸乙丑詔皇太子監國又曰上天降寶獻自楚州因以體元叶乎五紀其元年宜改爲寶應建巳月爲四月餘月並依常數仍依舊以正月一日爲歲首丁卯宜遺詔是日上崩于長生殿年五十二謚曰文明武德大聖大宣孝皇帝廟號肅宗寶應二年三月葬于建陵

史思明附

唐書史思明本名宰于營州寧州夷州突厥雜種胡人也

狹瘦少鬚顴鼻偃背眼目厥枯性急躁與安祿山同鄉里相校一日生思明除日生祿山歲日生及長相喜俱以驍勇聞初事特進烏知義每令輕騎覘賊必生擒以歸又解六蕃語與祿山同爲互市郎張守珪爲幽州節度奏爲折衝天寶初頻立戰功官至將軍知平盧軍事嘗入奏玄宗賜坐與語甚奇之問其年曰四十矣玄宗撫其背曰卿貴在後勉之遷大將軍北平太守十一載祿山奏授平盧節度都知兵馬使十四載祿山反命思明討饒陽等諸郡陷之十五載正月六日思明與蔡希德圍顏杲卿於常山九日拔之又圍饒陽二十九日不能拔李光弼出土門收常山郡思明解圍而拒光弼光弼列兵於城南相持累月光弼草盡使精卒以車數乘於旁縣取草輒被擊之其後率十四匹唯共得兩束草至劉蕡薦以劍之初祿山以賈循爲

范陽留後謀歸順爲副留守向潤客所殺以思明代之又以征戰在外令向潤客代其任四月朔方節度郭子儀以朔方蕃漢二萬人自土門而至常山軍威遂振南收趙郡思明退保博陵五月十日子儀光弼敗思明於沙河上思明以騎卒奔嘉山光弼擊之思明又敗走入博陵郡光弼圍之城方拔屬潼關失守肅宗理兵于朔方使中官邢延恩追朔方河東兵馬光弼入土門思明隨後邀擊之思明將卒頗精銳皆平盧戰士因南收常山趙郡又攻河間平原顏直卿以兵食旣盡乃渡河而南由是河北之地悉陷於思明至德二年正月思明以蔡希德合范陽上黨兵馬十萬圍李光弼於太原光弼使爲地道至城陣前驍賊方戲弄城中人地道中人擒而曳之賊以爲神呼爲地藏菩薩思明留十月會安祿山死慶緒令歸范陽希德留百餘

日竟不能拔而歸自祿山陷兩京常以駱駝運兩京御府珍寶於范陽不知紀極由是資其逆謀思明轉驕慶緒之命慶緒爲王師所敗投鄴郡其下蕃漢兵十五萬人初不知所從思明擊殺三千人然後降之慶緒使阿史那承慶安守忠徵兵於思明且欲圖之判官耿仁智忠諫之士謂思明曰大夫崇重人不敢言仁智請一言而死思明曰試言之對曰大夫以事祿山祿山兵權若是誰敢不服如大夫比者逼於兇威耳固亦無罪今聞孝感皇帝聰明勇智有少康周宣之略大夫發使輸誠必開懷見納此轉禍爲福之上策也思明曰善承慶等以三千騎至范陽思明悉衆介冑以逆之衆且數萬去之一里使人謂之曰相公及王遠至將士等不勝喜躍此皆邊兵怯懦頗懼相公之衆莫敢進也請弛弓以安之從之思明遂以承慶守忠入內廳

六平符覽 卷一百一十一
飲樂之別令諸將於其所分收其甲仗其諸郡兵皆給糧
恣歸之欲留者分隸諸營遂拘承慶斬守忠及李立節之
首會李光弼使衙官劾俛招之思明遂令衙官竇子昂奉
表以所管兵衆八萬人兼以僞河東節度高秀巖來降肅
宗大悅封思明爲歸義王范陽長史御史大夫河北節度
使朝義已下並爲列卿秀巖雲中太守以其男如嶽等七
人爲大官使內侍李思敬將軍烏承恩宣慰使令討殘賊
明年改元乾元四月肅宗使烏承恩爲副使候伺其過而
殺之初承恩父知義爲節度思明常事知義亦有開獎之
恩以此光弼冀其無疑因謀殺之承恩至范陽數漏其情
夜取婦人衣衣之詣諸將家以翻動之意諭之諸將以白
思明思明甚懼無以爲驗有頃承恩與思敬從上京來宣
恩命畢將歸私第思明留承恩息於館中思明當有所議

已令幃其所寢之床伏二人于其下承恩有小男先留范
陽思明令省其父夜後私於其子曰吾受命除此逆胡便
授吾節度矣床下二人叫呼而出以告思明思明令執之
搜其衣囊得朝廷所與阿史那承慶鐵券及光弼與承恩
之牒云承慶事了卽付鐵券不可付之又得簿書數
百紙皆載先所從反軍將名思明語之曰我何負於汝而
至是耶承恩稱死罪此太尉光弼之謀也思明集軍將官
吏百姓西向大哭曰臣以十三州之地十萬衆之兵降國
家赤心不負陛下何至殺臣因榜殺承恩父子囚李思敬
遣使表其事朝廷又令中使慰諭云國家與光弼無此事
乃承恩所爲殺之善也又有使從京至執三司議罪人狀
以示思明思明曰陳希烈已下皆重臣之功上皇弃之幸
蜀旣收復天下此輩當慰勞之今尚見殺况我本從祿山

反乎諸將皆云烏承恩之前事情狀可知光弼尚在憂不
細也大夫何不取諸將狀以誅光弼以謝河北百姓主上
若不惜光弼爲大夫誅之大夫乃安不然爲患未已思明
曰公等言是乃令耿仁智張不矜修表請誅光弼謝河北
若不從臣請臣則自領兵往太原誅光弼不矜初以表示
思明及封入函耿仁智盡削去之寫表者密白思明明
怒甚執二人於庭曰汝等何得負我命斬之仁智事思明
頗久意欲活之却令召入謂之曰我任使汝向三十年今
日之事我不負汝仁智大呼曰人生固有一死須存忠節
今大夫納邪說爲反逆之計縱延旬月不如早死請速加
斧鑕思明大怒亂捶殺之腦流于地十月郭子儀領九節
度圍相州安慶緒偷道求救於思明明思明明懼軍威之盛不
敢進十二月蕭華以魏州歸順詔遣崔光遠替之思明明擊

而拔其城光遠脫身南渡思明於魏州殺三萬人平地流
血數日卽乾元二年正月一日也思明於魏州北設壇僭
稱爲大聖燕王以周贄爲行軍司馬三月引衆救相州官
軍敗而引退思明召慶緒等殺之併有其衆四月僭稱大
號以周贄爲相以范陽爲燕京九月寇汴州節度使許驥
合於思明明思明明益振又陷洛陽與太尉光弼相拒思明明恣
行兇暴下無聊矣上元二年潛遣人反說官軍曰洛中將
士皆幽朔人咸思歸魚朝恩以爲然告光弼及諸節度僕
固懷恩衛伯玉等可速出兵以掃殘賊光弼等然之乃出
師南道齊進次榆林賊委物爲遁將士等不復設備皆入
城虜掠賊伏兵在北邙山下因大下士卒咸弃甲奔散魚
朝恩衛伯玉退保陝州光弼懷恩奔河陽城退居聞喜步
兵散死者數千人軍資器械盡爲賊有河陽懷州盡陷於

賊思明至陝州爲官軍所拒於姜子坂戰不利退歸永寧築三角城約一日內畢未泥思明至詬之對曰緣兵士疲乏暫歇耳又怒曰汝惜部下兵違我虜分令隨身數十人立馬看泥斯須而畢又曰待收陝州斬却此賊朝義大懼是夕思明居驛朝義在店中思明令心腹曹將軍總中軍兵嚴衛朝義將駱悅并許驥男季常等言主上欲害王悅與王死無日矣因言廢興之事古來有之欲喚取曹將軍舉大事可乎朝義迴面不應王悅曰王若不應悅等卽歸李家王亦不全矣朝義然之令許季常命曹將軍至悅等告之不敢拒其夜思明夢而驚悟據牀惆悵每好伶人寢食置左右以其殘忍皆恨之及此問其故曰吾向夢見水中沙上群鹿渡水而至鹿死水乾言畢如廁伶人相謂曰鹿者祿也水者命也胡祿命俱盡矣駱悅入問思明所在

及對殺數人因指在廁思明覺變踰牆出至馬槽韝馬騎之王悅等至令僉人周子俊射中其臂落馬曰是何事悅等告以懷王思明曰我朝來語錯合有此事然汝殺我太疾何不待我收長安終事不成矣因急呼懷王者三曰莫殺我囚我却罵曹將軍曰這胡誤我這胡誤我悅遂令心腹手擒思明赴柳泉驛曰事已成矣朝義曰莫驚聖人否莫損聖人否悅曰無時周贄許驥統後軍在福昌朝義令許季常往告之贄聞驚欲仆倒朝義領兵迴贄等來迎因殺贄思明至柳泉驛縊殺之朝義便僭偽位寶應二年爲李懷仙所擒梟首送關下

代宗孝武皇帝

唐書曰代宗孝武皇帝諱豫肅宗長子母曰章敬皇太后吳氏以開元十四年十二月生于東都上陽宮初名俶年

六平御覽 卷一百一十一
十五封廣平王玄宗諸孫百餘上爲嫡皇孫字量弘深寬而能斷喜愠不形於色仁孝溫恭動必由禮幼好學尤專禮易玄宗鍾愛之祿山之亂京城陷賊從肅宗蒐兵靈武以上爲天下兵馬元帥時朝廷草創兵寡寡弱上推心示信招懷流散比至彭原兵衆數萬及肅宗迴幸鳳翔時房瑁郭子儀繼戰不利賊鋒方銳屢來寇襲上選求勇幹頻挫其鋒聖慮遑寧士心大振及帥師進討雪涕辭違步出關門方始乘馬迴紇葉護王子率兵入助勇冠諸蕃上接以優恩結爲兄弟故香積之戰賊徒大敗遂委西京而遁雖子儀嗣業之奮命由上恩信結於士心故人思自效旣收京城民庶安堵秋毫不犯遺老歡迎對之歔歔聞賊殘衆猶保陝郊卽日長驅東趨虢略新店之役一戰大捷慶緒之黨十殲七八數旬之間河南底定兩都恢復二聖迴

鑾統率之功推而不受肅宗還京改封楚王乾元元年三月改封成王四月庚寅立爲皇太子改名豫上元末年兩宮不豫太子往來侍疾躬嘗藥膳衣不解帶者久之及承監國之命流涕從之寶應元年四月肅宗大漸所幸張皇后無子后懼上功高難制陰引越王係於宮中將圖廢立乙丑皇后矯詔召太子中官李輔國程元振素知之乃勒兵於凌霄門俟太子至卽衛從太子入飛龍廡以俟其變是夕勒兵於三殿收捕越王係及內官朱光輝馬英俊等禁錮之幽皇后於別殿丁卯肅宗崩程元振等始迎上於九仙門見群臣行監國之禮己巳卽皇帝位於柩前二年秋七月壬寅朔戊申羣臣上尊號曰寶應元聖文武皇帝御舍元殿授冊壬子御宣政殿宣制改元曰廣德大赦天下是月吐蕃大寇河隴陷秦成渭三州又大震關西陷蘭

廓河鄯洮岷等州盜有隴右之地己丑吐蕃寇涇州刺史高暉以城降因爲吐蕃鄉導冬十月庚午朔辛未高暉引吐蕃犯京畿寇奉天武功盩厔等縣蕃軍自司竹園渡渭循南山而東景子車駕幸陝州戊寅吐蕃入京師立廣武王承宏爲帝仍逼前翰林學士于可封爲制封拜辛巳車駕至陝州于儀在商州會六軍使張知節烏崇福長孫全緒等率兵繼至軍威遂振舊將王甫誘聚京城惡少年齊擊街鼓於朱雀街蕃軍震懾狼狽奔潰庚寅子儀收京城壬辰以宰臣元載判天下元帥癸巳以郭子儀爲京城留守十二月丁亥車駕發陝郡還京辛卯鄂州大風火發江中焚舡三千艘焚居人廬舍二千家甲午上至自陝州二年二月己巳朔冊天下兵馬元帥尙書令雍王适爲皇太子癸酉上親薦獻太清官太廟乙亥祀昊天上帝於圓丘

冬十月景寅僕固懷恩引吐蕃二萬寇邠州節度使白孝德閉城拒守丁卯寇奉天京師戒嚴先鋒將郭晞斬賊管於邠州西俘斬數百計三年春正月癸卯朔制大赦天下改爲永泰元年三月庚戌吐蕃請和詔宰臣元載杜鴻漸與蕃使同盟于興唐寺辛亥大風拔木是春大旱京師米貴斛至萬錢九月丁酉僕固懷恩死于靈州之鳴沙縣時懷恩誘吐蕃數十萬寇邠州蕃將尙給思贇磨尙悉東贇等寇奉天醴泉黨項羌渾奴刺寇同州及奉天逼鳳翔府盩厔縣京師戒嚴九年八月辛未幽州節度使朱泚遣弟滔奉表請自入朝兼自率五千騎防秋許之詔所司築第待之十年春正月乙未朔丁酉昭義牙將裴志清逐其帥薛勣奔洛州上章待罪志清率衆歸田承嗣乙未朱泚乞留京師西征吐蕃請以弟滔權爲幽州留後許之十二

年三月宰相元載王縉得罪下獄命吏部尚書劉晏訊鞠之辛巳制中書侍郎平章事元載賜自盡門下侍郎平章事王縉貶撫州刺史十四年五月癸卯上不康至辛亥不視朝辛酉詔皇太子監國是夕上崩于紫宸之內殿謚曰睿文孝武皇帝廟號代宗十月己酉葬元陵

太平御覽卷第一百一十二

唐書曰德宗孝文皇帝諱适代宗長子母曰睿真皇后沈氏天寶元年四月癸巳生於長安東宮其年十二月拜特進封奉節郡王代宗即位之年五月以上為天下兵馬元帥改封魯王八月改封雍王廣德二年二月立為皇太子大曆十四年五月辛酉代宗崩癸亥即位於太極殿六月己亥朔御丹鳳樓大赦天下八月以門下侍郎平章事崔祐甫為中書侍郎平章事以道州司馬同正楊炎為門下侍郎平章事乙巳遣太常少卿韋倫使吐蕃以蕃俘五百人還之示修好也冬十月吐蕃合南蠻之眾號二十萬三

太平御覽卷第一百一十三

皇王部三十八

唐德宗孝文皇帝

朱泚附

順宗安皇帝

德宗孝文皇帝

唐書曰德宗孝文皇帝諱适代宗長子母曰睿真皇后沈氏天寶元年四月癸巳生於長安東宮其年十二月拜特進封奉節郡王代宗即位之年五月以上為天下兵馬元帥改封魯王八月改封雍王廣德二年二月立為皇太子大曆十四年五月辛酉代宗崩癸亥即位於太極殿六月己亥朔御丹鳳樓大赦天下八月以門下侍郎平章事崔祐甫為中書侍郎平章事以道州司馬同正楊炎為門下侍郎平章事乙巳遣太常少卿韋倫使吐蕃以蕃俘五百人還之示修好也冬十月吐蕃合南蠻之眾號二十萬三

道寇莪州扶文黎雅等州連陷郡邑發禁兵四千助蜀大破之十二月乙卯立宜王誦爲皇太子建中元年春正月丁卯朔御含元殿改元建中群臣上尊號曰聖神文武皇帝己巳朝太清宮庚午謁太廟辛未有事於郊丘還宮御丹鳳門大赦天下自艱難已來徵賦名目頗多今後除兩稅外輒率一錢以枉法論二年三月築汴州城初大曆中李正己有淄青齊海登萊沂密德棣曹濮徐兗鄆十五州之地李寶臣有恒定易趙深冀滄七州之地田承嗣有魏博相衛洛貝澶七州之地梁崇義有襄鄧均房復郢六州之地各聚兵數萬始因叛亂得立雖朝廷寵待加恩心猶疑貳皆連衡盤結以自固先是汴州以城隘不容衆請廣之至是築城五月景寅以軍興十一而稅冬十一月尙書左僕射楊炎貶崖州司馬尋賜死三年四月封朱滔爲通

義郡王朱滔王武俊與田悅合從而叛十一月朱滔田悅王武俊於魏縣軍壘各相推獎僭稱王號署官名如國初親王行臺之制丁丑李希烈自稱天下都元帥太尉建興王與朱滔等四盜膠固爲逆四年春正月鳳翔節度使張鎰與吐蕃宰相尙結贊同盟于清水庚寅李希烈陷汝州執州將李元吉而去東都震駭甲午遣顏真卿宣慰李希烈軍八月丁未李希烈率衆三萬攻哥舒曜於襄城東都危急冬十月詔涇原節度使姚令言率涇原之師救哥舒曜丁未涇原軍出京城至澠水倒戈謀叛姚令言不能禁止上令載繒綵二車遣晉王往慰諭之亂兵已陣于丹鳳闕下促神策軍拒之無一人至者上與太子諸王妃主百餘人出苑北門右龍武軍使令狐建方教射於軍中聞難聚射士得四百人扈從其夕至咸陽餽數匕而過戊申至

奉天己酉元帥都虞候渾瑊以子弟家屬至乃以瑊爲行
在都虞候亂兵旣剽京城屯於白華乃於晉昌里迎朱泚
爲帥稱大尉居含元殿上以奉天隘欲幸鳳翔壬子鳳翔
軍亂殺節度使張鑑乃止癸丑李希烈陷襄城哥舒曜走
洛陽丁巳邠寧節度韓遊瓌與論惟明率兵三千至纔入
奉天賊軍亦至乃出拒之王師不利賊攻城愈急矢石雨
下死傷者衆人心危蹙上與渾瑊對泣朱泚據乾陵作樂
下瞰城中辭多侮慢戊子朔方節度使李懷光遣兵馬使
張韶奉表言大軍將至乃令昇韶巡城叫呼歡聲動地賊
不之測疑懼緩攻癸巳懷光軍次醴泉是夜賊解圍而去
神策將李晟自定州率師赴難軍於渭橋興元元年春正
月上在奉天詔曰克致興化必在推誠忘己濟人不悛改
過朕嗣服丕構君臨萬邦失守宗祧越在草莽不念率德

誠莫追於旣往永言思咎期有復於將來明徵其義以示
天下予小子懼德不嗣罔敢怠荒然以長於深宮之中暗
於經國之務積習易溺居安忘危不知稼穡之艱難不卹
征戍之勞苦澤靡下究情不上通事旣擁隔人懷疑阻猶
昧省己遂用興戎徵師四方轉餉千里賦車藉馬遠近騷
然行賫居送衆庶勞止力役不息田萊多荒暴令峻於誅
求疲民空於杼軸轉死溝壑離去鄉閭邑里丘墟人烟斷
絕天譴於上而朕不寤人怨於下而朕不知馴致亂階變
起都邑賊臣乘釁肆逆滔天曾莫愧畏敢行陵僭萬品失
序九廟震驚上累于祖宗下負于蒸庶痛心覩面罪實在
予永言愧悼若墜泉谷賴天地降祐人祇叶謀將相竭誠
爪牙宣力群盜斯屏皇維載張將弘永圖必希新令朕晨
興夕惕惟省前非乃者公卿百寮用加虛美以聖神文武

之號被蒙暗寡昧之躬固辭不獲俯遂羣議昨因內省良
所瞿然自今已後中外書奏不得言聖神文武之號今上
元統曆獻歲發祥宜革紀年之號式敷在宥之澤可大赦
天下改建中五年爲興元元年李希烈田悅王武俊李納
咸以勳舊繼守藩維朕撫馭乖方致其疑懼皆由上失其
道而下羅其災一切並與洗滌復其爵位待之如初仍即
遣使宣諭朱滔以泚連坐路遠必不同謀永念舊勳務存
弘貸如能効順亦與惟新朱泚反易天常盜竊名器暴犯
陵寢所不忍言獲罪祖宗朕不敢赦除泚外並從原宥二
月甲子加連城郡王李懷光太尉仍賜鐵券赦三死罪懷
光怒曰凡人臣反逆乃賜鐵券恕以不死今懷光是反定
矣因投之於地上聞懷光將叛令翰林學士陸贄往慰諭
之其詞禮益倨悖尋李晟自咸陽移兵東渭橋避懷光也

晟以懷光反狀已明請上幸蜀丁卯車駕幸梁州留戴休
顏守奉天三月懷光燒營走歸河中庚寅車駕次城固壬
辰至梁州四月辛丑朔時將士未給春衣上猶夾服漢中
早熟左右請御暑服上曰將士未易冬服獨御春衫可乎
俄而貢物繼至先給諸軍而始御之五月李晟自渭北移
軍於光泰門外賊來薄我軍士奮擊大敗之斬馘千計戊
戌晟列陣於光泰門外遣騎將史萬頃往神麴村開苑牆
二百餘步賊樹柵當之我軍爭拔柵與賊血戰賊黨大敗
追擊至白華朱泚姚令言率衆萬餘遁去晟收復京城是
日渾瑊與戴休顏亦破賊三千於咸陽韓遊瓌追朱泚於
涇州六月李晟上收京城露布上覽之涕下霑襟涇州田
希鑿斬姚令言幽州軍士韓旻於彭原斬朱泚並傳首至
行在乙巳遣東部侍郎班宏入京宣慰六月戊午車駕發

興元秋七月景子次鳳翔府壬午至自興元辛卯御丹鳳樓大赦天下九月丁亥上頗謂宰臣曰今大盜雖除時猶多難宜廣延納以達下情近日諫官都無論奏自今每正衙及延英坐日常令朝臣三兩人面奏時政得失庶有弘益也貞元元年正月丁酉朔御含元殿受朝賀禮畢宣制大赦天下改元時關東大飢賦調不入國用益窘關中飢民蒸蝗蟲而食之五月分命朝臣禱羣神以祈雨蝗自海而至羣飛蔽天每下則草木及畜毛無復子遺穀價騰踊九月朔方大將牛名俊斬李懷光傳首闕下馬燧收復河中十月上御正殿策賢良方正能直言極諫等三科舉人十一月癸卯上親祀昊天上帝於圓丘禮畢御丹鳳樓大赦天下二年四月景寅淮西李希烈爲其牙將陳仙奇所醜并誅其妻子仙奇以淮西歸順九月乙巳吐蕃寇好時

京師戒嚴李晟部將王佖擊吐蕃於汧陽城敗其中軍辛亥寇鳳翔李晟出師禦之一夕而退冬十月李晟拔吐蕃摧沙堡十一月冊淑妃王氏爲皇后丁酉后崩謚曰昭德辛丑吐蕃陷鹽州三年三月河東馬燧來朝時吐蕃相結贊使大將論頰熟甲辭厚意告馬燧請兩國同盟上疑其不誠不允故燧自將論頰熟入朝盛言蕃相請盟可以保信上從之五月辛未侍中渾瑊與吐蕃宰相尚結贊同盟于平涼爲蕃兵所劫瑊遁而獲免崔漢衡已下將吏陷沒者六十餘人四年春正月上御丹鳳樓大赦天下京師地震辛亥又震壬子又震甲寅地震宴群臣於麟德殿己未地震丁卯有司條奏省官其左右常侍太子賓客請依前置四員從之壬戌加置諫議大夫八員分中書四員爲右門下四員爲左是月吐蕃寇涇邠寧鄜慶等州焚彭原縣

邊將閉城自固賊驅人畜三萬計凡二旬而退五年春正月乙卯詔自今宜以二月一日爲中和節以代正月晦日備三令節數內外官司休假一日二月庚子以大理卿董晉爲門下侍郎同平章事以御史中丞竇參爲中書侍郎平章事兼轉運使六年春正月大雪二月戊辰朔百寮會宴於曲江亭上賦中和節羣臣賜宴詩七韻是日百寮進兆人本業三卷八年四月乙未貶中書侍郎平章事竇參爲郴州別駕以尙書左丞趙憬兵部侍郎陸贄並爲中書侍郎同中書門下平章事八月以天下水災命朝臣宣撫賑貸河南河北山南江淮凡四十餘州大水漂溺死者二萬餘人九年正月癸卯初稅茶歲得錢四十萬貫從鹽鐵使張滂所奏茶之有稅自此始五月乙巳韋臯破吐蕃岷和城定廉城通鶴軍凡平堡五十餘所冬十月環王國獻

犀牛上令見于太廟十年冬十月御宣政殿試賢良方正能直言極諫等舉人十二月貶中書侍郎平章事陸贄爲太子賓客十二年三月以戶部侍郎裴延齡爲戶部尙書六月初置左右護軍中尉十二月乙未大雪平地二尺竹柏多死環王國所獻犀牛是冬凍死上著刑政箴一首癸未迴紇南詔劍南西山八國女國王並來朝賀十三年春正月吐蕃贊普遣使修好塞上以聞上以犬戎負約不受其使十六年春正月恒翼易定陳許河陽四鎮之師與賊戰皆不利而退二十一年春正月御含元殿受朝賀是日上不康癸巳會羣臣於宣政殿宣遺詔皇太子宜於柩前卽位是日崩於會寧殿享壽六十四諡曰神武孝文皇帝廟號德宗葬崇陵

朱泚附

唐書曰朱泚幽州昌平人曾祖利贊善大夫贈禮部尚書祖思明太子洗馬贈太子太師父懷珪天寶初事范陽節度使裴寬爲衙前將授折衝將軍及安祿山史思明反叛累爲管兵將寶應中李懷仙歸順奏爲薊州刺史平盧軍留後柳城軍使卒贈左僕射泚以父資從軍幼壯偉腰帶十圍騎射武藝亦不出人外若寬和中頗忍忌然輕財好施每征戰所得賞物輒分與麾下將士以是爲衆所推故得濟其兇謀初隸李懷仙爲部將改經略副使朱希彩旣殺李懷仙自爲節度以泚宗姓甚委信之希彩爲政苛酷人不堪命大曆七年秋音爲孔目官李懷瓊所殺倉卒之際未有所從泚營在城北第滔主衙內兵亦得衆心滔變詐多端潛使百餘人於衆中大言曰節度使非城北朱副使莫可衆旣無從因共推泚泚遂權知留後遣使奉表京

師十月拜檢校左散騎常侍兼御史中丞幽州盧龍節度等使八年三月遷幽州盧龍節度等使幽州長史兼御史大夫其年泚上表令弟滔率兵二千五百人赴京西防秋代宗嘉之手詔褒美九年就加檢校戶部尚書賜實封百戶幽州及河北諸鎮自天寶末便爲逆亂之地李懷仙朱希彩與連境三節度名雖向順未嘗朝謁至是泚率先上表請自領部騎三千人入覲詔修甲第以待之九月泚至京師代宗御內殿引見賜御馬兩匹戰馬十匹金銀錦綵甚厚又以器物十牀馬四十四匹綰二萬匹衣一千七百襲賜其將士宴犒之盛近時未有泚又上表請留京師從之因授其弟滔兼御史大夫幽州節度留後仍以河陽永平軍防秋兵郭子儀統之決勝軍楊猷兵李抱玉統之淮西鳳翔兵馬璘統之汴宋淄青兵俾泚統焉十一年八月加

拜同平章事尋令出鎮奉天行營復賜金銀繒綵并內庫
弓箭以寵之十二年加檢校司空代李抱玉爲隴右節度
使權知河西澤潞行營兵馬事德宗嗣位加太子太師鳳
翔尹實封至三百戶建中元年涇州將劉文喜阻兵爲亂
加泚四鎮北庭行軍涇原節度使與諸軍討伐涇州平加
泚中書令還鎮鳳翔而以舒王謨遙領涇原節度二年又
加泚太尉朱滔將反叛陰使人與泚計議以帛書內蠟丸
中置髮髻間河東節度馬燧搜獲之以聞并送帛書及所
遣使泚惶懼頓首乞歸罪有司上勉之曰千里不同謀非
卿之過三年四月以張鑑代泚爲鳳翔隴右節度留後留
泚京師加實封至一千戶與一子正員官其幽州盧龍節
度太尉中書令並如故四年十月涇原兵叛鑾駕幸奉天
叛卒等以泚嘗統涇州知其失權廢居怏怏思亂羣寇無

帥幸泚政寬乃相與謀曰朱太尉久囚空宅若迎而爲主
事必濟矣姚令言乃率百餘騎迎泚於進昌里第泚乘馬
擁從北向燭炬星羅觀者萬計入居含元殿明日移虬白
華但稱太尉朝官有謁泚者悉勸奉迎鑾駕旣不合泚意
皆逡巡而退源休至遂屏人移時言多悖逆又盛陳成敗
稱述符命勸其僭僞泚甚悅之又李忠臣張光晟繼至咸
以官閑積憤樂於禍亂鳳翔涇原大將張庭芝段誠諫以
潰卒三千餘自襄城而至賊泚自謂衆望所集僭竊之心
自此而定乃以源休爲京兆尹判度支李忠臣爲皇城使
段秀實久失兵柄故推心委之遂發銳師三千言奉迎乘
輿實陰有逆謀秀實與海賓謀誅泚且慮叛卒之震驚
法駕乃潛爲賊符追所發兵至六日兵乃駱驛而迴因與
海賓同入見泚爲陳逆順之理而海賓於靴中取匕首爲

其所覺遂不得前秀實知不可以義動遽奪源休象笏挺
而擊泚仍大呼曰反虜當萬斬泚舉臂衛首秀實格拉之
恂恂然李忠臣馳助泚泚素多力纔破其面逆徒謀集秀
實海賓遂併見害明日聲言以親王權主社稷士庶競往
觀之八日源休姚令言李忠臣張光晟等八人導泚自白
華入宣政僭卽僞位自稱大秦皇帝號應天元年愚智莫
不憤怒侍衛皆卒伍寮吏行列不過十餘人下僞詔曰幽
囚之中神器自至豈朕薄德所能經營彭偃之詞也僞署
姚令言爲侍中李忠臣爲司空兼侍中源休爲中書侍郎
平章事判度支蔣鎮爲吏部侍郎樊系爲禮部侍郎儀禮
使許季常爲京兆尹洪經綸爲太常少卿彭偃爲中書舍
人裴揆崔幼真爲給事中崔宜爲御史中丞張光晟仇勣
忠劾釭張寶何望之段誠諫張庭芝杜如江爲節度使仍

以其兄子遂爲太子遙封弟滔爲冀王太尉尚書令尋又
號皇太弟十月泚自領兵侵逼奉天竊威儀輦輅闐隘道
途蟻聚之衆軍勢頗盛以姚令言爲元帥張光晟爲副以
李忠臣爲京兆皇城留守居中書省尋以蔣鎮爲門下侍
郎李子平爲諫議大夫並平章事泚軍合於城下渾城韓
遊瓌禦之泚衆大敗死者萬計泚收軍於奉天東三里下
營大修改具明日泚又分兵營於乾陵下瞰城內大震十
一月三日杜希全與泚衆戰於莫谷官軍不利自是賊衆
驕怠王師乘城而戰人百其勇賊多敗衄或出野戰官軍
又獲利焉泚乃大驅百姓填塹夜攻城城中設奇以應之
賊乃退縮西明寺僧法堅有巧思爲泚造雲梯十五日辰
時梯臨城東北隅城內震駭渾瑊侯仲莊設大坑爲地道
陷之又縱火焚其梯東風起吹我軍衆頗危俄而風迴吹

賊軍瑊益薪潑油鼓齊震風火俱熾須臾雲梯與兇黨同
爲灰燼城中三門悉出兵王師又捷其夜兵復出攻泚衆
敗績李懷光以五萬人來援自河北至泚衆惶駭因而潰
長圍遂解衆以爲懷光三日不至城則危矣二十日夜泚
走至京城時姚令言於城造戰格拋樓每坊團練人心大
擾泚自奉天迴乃悉令去之曰攻戰吾自有計前此每三
五日卽使人僞自城外來周走號令曰奉天已破百姓聞
之莫不欲泣道路闐寂時有入臺省吏人不過十數輩郎
官六七人而亦令依常年舉選初有數十人陳狀旬日亦
皆屏退泚自號其宅曰潛龍宮悉移內庫珍寶以實之識
者曰易稱潛龍勿用此敗徵也無幾百姓剽奪其珍寶泚
不能禁止明年正月一日泚改僞國號曰漢稱天皇元年
二月李懷光旣圖叛逆遣使與泚通和鑾駕幸梁洋自此

衣冠之潛匿者出授僞官十七八焉懷光初與泚往復通
好甚密以錢穀金帛互相饋遺泚與書事之如兄約云削
平關中當割據山河永爲隣國及懷光決計背叛逼乘輿
遷幸泚乃下僞詔書待懷光以臣禮仍徵兵馬懷光旣爲
所賣慙怒憤恥遂領衆遁歸河中三月李晟駱元光尙可
孤之衆悉於城東累敗泚衆四月泚使韓旻宋歸朝張庭
芝等寇武功渾瑊以衆及吐蕃論莽羅大敗旻歸朝殺逆
黨萬餘人於武亭川五月泚又使仇劼忠寇藍田尙可孤
擊之大破泚衆擒劼忠斬之李晟駱元光尙可孤悉還師
齊進晟屯光泰門逆徒拒官軍王師累捷二十八日官軍
入苑收京師逆黨大潰泚與姚令言張庭芝源休李子平
朱遂以數千人西走其餘黨或奔竄或來降泚衆緣路潰
散乃奔涇州纔百餘騎而已田希鑒閉門登陴泚令謂希

鑿曰我與爾節度何故背恩希鑿乃使人自城上擲泚所
送旌節於外續又投火焚之泚遂過數里息於逆旅泚將
梁庭芬入涇州說田希鑿曰我公比日殺馮河清背叛今
雖歸順國家必不能久容公他日不免受禍何如開門納
朱公與共成事希鑿以爲然庭芬乃追及朱泚言之泚大
悅使庭芬却往涇州庭芬請授己尚書平章事泚不從庭
芬既求宰相不得不復往涇州從泚至寧州彭原縣西城
屯與泚心腹朱惟孝共射泚泚走墜故審中泚左右韓旻
薛綸高幽巖武震朱進卿董希芝共斬泚使宋應傳首以
獻泚死時年四十三姚令言投涇州源休李子平走鳳翔
尋並斬獲宋歸朝之敗武功降於李懷光送興元斬之唯
不獲朱遂傳爲野人所殺或云與泚子壻僞金吾將軍馬
悅潛走党項部落數月得達幽州泚之僭逆宦豎朱重耀

頗親密用事泚每呼之爲兄時賊中以臘月大雨僞星官
謂泚曰當以宗中年長者讓其災變泚乃毒殺重耀以王
禮葬焉及京師平出其尸而斬之

順宗安皇帝

唐書曰順宗安皇帝諱誦德宗長子母昭德皇后王氏上
元二年正月生於長安之東內大曆十四年封宣王建中
元年正月立爲皇太子貞元二十一年正月癸巳德宗崩
景申卽位於太極殿上自二十年九月風病不能言暨德
宗不豫諸王親戚皆侍醫藥獨上卧病不能侍德宗彌留
思見太子涕咽久之大行發喪人情震懼上力疾褻服見
百寮於九仙門旣卽位知社稷有奉中外始安庚子羣臣
上書請聽政二月以吏部郎中韋執誼爲尚書右丞同中
書門下平章事壬寅以太子侍書翰林待詔王伾爲左散

騎常侍充翰林學士以將仕郎前蘇州司功參軍翰林待詔王叔文爲起居舍人充翰林學士甲子御丹鳳樓大赦天下三月癸酉詔冊廣陵郡王淳爲皇太子改名純赦京城繫囚以給事中陸質中書舍人崔樞並爲太子侍讀七月詔朕承九聖之烈荷萬邦之重願以寡德涉道未明虔恭畏懼不克負荷恐上墜祖宗之訓下貽卿士之憂夙夜祇勤如臨淵谷而積疾未復至于經時怡神保和常所不暇永惟四方之大萬務之殷不躬不親慮有曠廢加以山陵有日霖潦踰旬是用儆于朕心以答天戒其軍國政事宜令皇太子勾當時上久疾不復延納宰臣共論大政事無巨細皆決於李忠言王伾王叔文物論諠雜以爲不可藩鎮屢上牋於皇太子指三監之撓政故有是詔以太常卿杜黃裳爲門下侍郎左金吾衛大將軍表滋爲中書侍

郎並同中書門下平章事皇太子見百寮於朝堂八月庚子詔惟皇天祐命烈祖誕受萬國九聖儲祉萬邦咸休肆予一人獲纘丕業嚴恭守位不遑暇逸而天祐不降疾恙無瘳將何以奉宗廟之靈展郊禋之禮疇咨庶尹對越上玄內媿于朕心上畏于天命夙夜祇慄深惟永圖一日萬機不可以久曠天工人代不可以久違皇太子純睿哲溫文寬和仁惠孝友之德愛敬之誠通乎神明格于上下是用法皇王至公之道遵父子傳歸之制付之重器以撫兆人必能宣祖宗之重光荷天地之休命奉若成憲永綏四方宜令皇太子卽皇帝位朕稱太上皇居興慶宮制稱誥辛丑誥有天下傳歸於子前王之制也欽若大典斯爲至公式揚耿光用體文德朕獲奉宗廟臨御萬方降疾不瘳庶政多闕乃命元子代予守邦爰以令辰光膺冊禮宜以

今月九日冊皇帝於宣政殿國有大命恩俾惟新宜因紀
元之慶用覃在宥之澤宜改貞元二十一年爲永貞元年
天下死罪降徒流已下遞減一等立良娣王氏爲太上皇
后良媛董氏爲太上皇德妃壬寅貶王伾爲開州司馬王
叔文爲渝州司戶元和元年正月景寅朔皇帝率百寮上
太上皇尊號曰應乾聖壽甲申太上皇崩于興慶宮之咸
寧殿享年四十六謚曰至德大聖大安孝皇帝廟號順宗
葬于豐陵史臣韓愈曰順宗之爲太子也留心藝術善隸
書德宗工爲詩每賜大臣方鎮詩制必命書之性寬仁者
有斷禮重師傳必先致拜從幸奉天賊泚逼迫常身先禁
旅乘城拒戰督勵將士無不奮激德宗在位歲久稍不做
權宰相左右倖臣如裴延齡李齊運韋渠牟等因閹用事
刻下取功而排陷陸贄張滂輩人不敢言太子從容論諍

故卒不任延齡渠牟爲相嘗侍宴魚藻宮張水嬉綵艦雕
靡宮人引舟爲權歌絲竹間發德宗歡甚太子引詩人好
樂無荒對每於敷奏未嘗以顏色假借宦官居儲位二十
年天下陰受其賜惜乎寢疾踐祚近習弄權而能傳政元
良克昌運祚賢哉

太平御覽卷第一百一十三

元之廣用軍在府之屬宜改員五二
 太平御覽卷一百一十三
 后夏煥黃氏為太上皇孫
 叔父為州州司戶元和元年
 太上皇孫黃氏為太上皇孫
 享教平年
 其夜昌服非寶
 羊天不刻受其艱計平獄飛
 樂無然世於林煥未嘗以
 顯宮人氏長命辭煥絲竹間
 對卒不計煥請乘半歲休嘗
 嘗其

太平御覽卷第一百一十四

皇王部三十九

唐憲宗章武皇帝

敬宗昭愍皇帝

憲宗章武皇帝

穆宗文惠皇帝

唐書曰憲宗章武皇帝諱純順宗長子母曰莊憲王太后
 大曆十三年生於長安之東宮內六七歲時德宗抱置膝
 上問曰汝誰子在吾懷對曰是第三天子德宗異之貞元
 四年六月封廣陵王順宗即位之年四月冊為皇太子八
 月乙巳即皇帝位於宣政殿先是連月霖雨是日晴霽人
 情忻悅丁未始御紫宸殿對百寮庚戌詔曰朕以寡昧纂
 承洪業永思理本所寶惟賢至如嘉禾神芝奇禽異獸蓋
 王化之虛美也所以光武形於詔令春秋不書祥瑞朕誠

德薄思及前人自今已後所有祥瑞有司不得上聞其珍禽奇獸亦宜停進冬十月壬申貶中書侍郎同中書門下平章事韋執誼爲崖州司馬以交王叔文也元和元年春正月景寅朔皇帝率群臣於興慶宮奉上太上皇尊號丁卯御含元殿受朝賀禮畢御丹鳳樓大赦天下改元癸未詔以太上皇舊恙愈和親侍藥膳權不聽政以高崇文檢校工部尚書充神策行營節度使甲申太上皇崩乙酉宰相杜佑攝冢宰戊子制曰劍南西川疆界素定藩鎮守備各有區分頃因元臣薨謝隣藩不睦劉闢乃因虛構隙以忿結讎遂勞三軍兼害百姓朕志存含垢務欲安人遣使宣諭委之旄鉞如聞道路擁塞未息干戈輕肆攻圍擬圖吞併爲君之體義在勝殘命將興師蓋非獲已宜令興元嚴礪東川李康猗音角應接神策行營節度使高崇文神

策兵馬使李元奕率步騎之師與東川興元之師類會進討甲午高崇文出斜谷路李元奕出駱谷路俱會于梓潼關辛卯群臣請聽政戊戌上謂宰臣曰前代帝王或怠於聽政或躬覽繁務其道何如杜黃裳對曰帝王之務在於脩己簡易擇賢委任不宜怠肆安逸然事有綱領小大當務其遠者大者至如簿書獄訟百吏能否本非人主所自任也但擇人委任責其成效賞罰必信誰不盡心傳稱帝舜之德曰夫何爲哉恭己正南面而已誠以能舉十六相去四凶也豈與勞神疲體自任耳目之主同年而語哉但人主常勢患在不能推誠人臣之弊患在不能自竭由是上疑下詐禮貌或虧欲求致理自然難致苟無此弊何患不至於理上稱善久之五月辛卯冊太上皇后王氏爲皇太后九月辛亥高崇文奏收成都擒劉闢以獻癸丑以山

人李渤爲左拾遺徵不至二年春正月上親朝獻太清宮
御丹鳳樓大赦天下己酉以戶部侍郎武元衡爲門下侍
郎同平章事以中書舍人翰林學士李吉甫爲中書侍郎
同平章事二月庚午司天造新曆成詔題爲元和觀象曆
九月庚申李錡據潤州反殺判官王澹大將趙琦遂合蘇
常杭湖睦五州戍將殺刺史脩石頭故城欲謀僭逆癸酉
潤州大將張子良李奉仙等執李錡以獻十一月斬錡詔
削屬籍十二月景辰上謂宰臣曰朕覽國書見文皇帝行
事少有過差諫臣論諍往復數日况朕之寡昧涉道未明
今後事或未當卿當每事十論不可一二而止己卯史官
李吉甫撰元和國計簿總計天下方鎮凡四十八管州府
二百九十五縣一千四百五十三戶二百四十四萬二百
五十四其鳳翔鄜坊邠寧振武涇原銀夏靈鹽河東易定

魏博鎮冀范陽滄景淮西淄青十五道凡七十一州不申
戶口每歲賦入倚辨止於浙江東西宣歙淮南江西鄂嶽
福建湖南等八道合四十九州一百四十四萬戶比量天
寶供稅之戶則四分有一天下兵戎仰給縣官者八十三
萬餘人比量天寶土馬則三分加一率以兩戶資一兵其
他水旱所損徵科發歛又在常役之外是歲吐蕃廻紇奚
契丹渤海上音藏下音哥南詔並朝貢三年春正月癸巳群
臣上尊號曰睿聖文武皇帝御宣政殿受冊禮畢御丹鳳
樓大赦天下庚子涇原段祐請脩臨涇城在涇州北九十
里扼犬戎之衝要詔從之四年秋七月御製前代君臣事
迹十四篇書於六扇屏風是日出書屏以示宰臣丁未渭
南暴水壞廬舍二百餘戶口溺死六百人命府司賑給八
月安南都護張丹奏破環王國三萬餘人獲戰象兵械并

太子五十九人十月冊鄧王寧爲皇太子癸巳以冊儲肆
赦繫囚死罪降從流已下遞減一等工部侍郎歸登給事
中呂元膺爲皇太子諸王侍讀五年八月乙亥上謂宰臣
曰神仙之事信乎李藩對曰神仙之說出於道家道家所
宗老子五千文爲本老子指歸與六經無異前代好怪之
流假託老子爲神仙之說故秦始皇遣方士載童男女入
海求仙藥漢武帝嫁女與方士求不死藥二主受惑卒無
所得文皇帝服胡僧長生藥遂致暴疾不救古詩云服食
求神仙多爲藥所悞誠哉是言也君人者但務求理四海
樂推社稷延永自然長年也上深然之六年十一月乙丑
制以戶部侍郎李絳爲中書侍郎同平章事十二月辛卯
皇太子寧薨謚曰惠昭七年五月上謂宰臣曰卿言吳越
去年水旱昨有御史自江淮廻言不至爲災人不甚困李

絳對曰臣得兩浙江淮南狀相繼言歉旱方隅授任皆朝
廷信重之臣御史非良或容希媚此正當姦佞之目況推
誠之道君人大本任大臣以事不可以小臣言閒之伏望
明示御史姓名正之典刑上曰卿言是也朝廷大體以恤
人爲本一方不稔卽宜賑救濟其飢寒況可疑之耶向者
不思而有此問朕言過矣八年三月辛未上以久旱親於
禁中祈雨是夜澍雨霑足六月景寅京師大風雨毀屋飄
瓦人多壓死所在川瀆暴漲行人不通辛丑出宮人二百
輦任從所適以水災故也九年十月甲子制曰朕嗣膺寶
位於茲十年每推至誠以御方夏庶以仁化臻於大和宵
衣旰食意屬於此今淮西一道未達朝經擅自繼襲肆行
寇掠將士等迫於受制非是本心思去三面之羅庶遵兩
階之義宜以山南東道節度使嚴綬兼充申光蔡等州招

撫使十年正月嚴綬帥師次蔡州界己亥制削奪吳元濟
官爵六月鎮州節度使王承宗遣盜夜伏於靖安坊刺宰
相武元衡死之刺御史中丞裴度傷首而免十二年五月
隨唐鄧節度使李愬奏敗賊於吳房獲賊將李祐七月以
裴度守門下侍郎同平章事充彰義軍節度申光蔡觀察
處置等使仍充淮西宣慰使十月李愬率師入蔡州執吳
元濟以獻淮西平十三年正月御舍元殿受朝賀禮畢御
丹鳳樓大赦天下七月詔削奪淄青節度使李師道官爵
仍令宣武魏博義成等五鎮之師分路進討十二月上謂
宰臣曰人臣事君但力行善事自致公望何乃好樹朋黨
朕甚惡之裴度對曰君子小人未有無徒者君子之徒則
同心同德小人之徒是朋是黨上曰他人之言亦與卿等
相似豈易辯之哉度曰君子小人觀其所行當自區別矣

上曰凡好事口說則易躬行則難卿等既言之須行之勿
空口說度等謝曰陛下處分可謂至矣臣等敢不激勵然
天下之人從陛下所行不從陛下所言臣等亦願陛下每
言之則行之上頗忻納十四年春正月以東師宿野不受
朝賀三月上謂宰臣曰聽受之間大是難事推誠選任所
謂委寄必合盡心及至所行臨事不無偏黨朕臨御已來
歲月斯久雖不明不敏然漸見物情每於行爲務欲詳審
比令學士集前代昧政之事爲辨謗略每欲披閱以爲鑒
戒耳崔羣對曰無情曲直辯之至易稍懷欺詐審之實難
故孔子有衆好衆惡之論浸潤膚受之說蓋以曖昧難辯
故也若擇賢而任之以誠糾之以法則人自歸公孰
敢行僞陛下詳觀載籍以廣聰明實天下幸甚七月群臣
上尊號曰元和聖文神武法天應道皇帝是日御宣政殿

太平御覽 卷一百一十四 五
受冊御丹鳳樓大赦天下八月上謂宰臣曰天下事重不可一日曠廢若遇連假不坐有事卽詣延英請對崔羣以殘暑方甚目同列將退上止之曰數日一見卿等時雖暑熱朕不爲勞九月上謂宰相曰朕讀玄宗實錄見開元初銳意求理至十六年已後稍似懈倦開元末又不及中年何也崔羣對曰玄宗少歷民間身經迍難故即位之初知人疾苦躬勤庶政加之姚崇宋璟蘇頌盧懷慎等守正之輔孜孜獻納故致治平及後承平日久安於逸樂漸遠端士而近小人宇文融以聚斂媚上心李林甫以姦邪惑上意加之以國忠故及於亂願陛下以開元初爲法以天寶末爲戒卽社稷無疆之福也時皇甫鏞以諂刻欺蔽在相位故羣因奏以諷之上服方士柳泌金丹藥起居舍人裴隣上表切諫以金石含酷烈之性加燒鍊則火毒難制若

金丹已成且令方士自服一年觀其効用則進御可也上怒貶隣爲江陵令十五年春正月甲戌朔上以餌金丹小不豫罷元會庚子夕上崩于大明宮之中和殿享年四十三謚曰聖神章武孝皇帝廟號憲宗葬于景陵

穆宗文惠皇帝

唐書曰穆宗文惠皇帝諱恒憲宗第三子也母曰懿安皇后郭氏貞元十一年七月生於大明宮之別殿初名宥封建安郡王元和七年十月冊爲皇太子改今諱十五年正月憲宗崩閏月景午卽皇帝位於太極殿東序戊申上見群臣於紫宸門外辛亥以蕭俛段文昌爲中書侍郎同平章事上始御延英對宰臣二月丁丑御丹鳳樓大赦天下壬寅勅舉賢良方正直言極諫科目人宜令中書門下尙書省四品已上於尙書省同試三月壬子召侍講學士韋

處厚路隨於太液亭講毛詩關雎尚書洪範等篇既罷並
賜緋九月辛丑大合樂於魚藻宮觀競渡又召李愬李光
顏入朝欲於重陽日宴羣臣拾遺李珣等上疏諫云元朔
未改園陵尙新雖易月之期俯從人欲而三年之制猶服
心喪夫邊密施禁蓋爲齊人合樂內庭事將未可不聽十
月鎮州王承元以所部四州請命以魏博節度等使田弘
正爲鎮州節度使以承元爲滑州節度使長慶元年正月
己亥朔上親薦獻太清宮太廟是日法駕赴南郊日抱珥
宰臣賀於前辛丑祀昊天上帝於圓丘即日還宮御丹鳳
樓大赦天下改元長慶內外文武及致仕官三品已上賜
爵一級二月景子上觀雜伎樂於麟德殿歡甚謂給事中
丁公著曰比聞外閒公卿士庶時爲歡宴蓋時和民安甚
慰予心公著對曰誠有此事然臣之愚見風俗如此亦不

足嘉百司庶務漸恐勞煩聖慮上曰何至於是對曰夫賓
宴之禮務達誠敬不繼以淫故詩人美樂且有儀璘異屢
舞前代名士良辰宴聚或清談賦詩投壺雅歌雖以盃酌
獻酬不至於亂國家自天寶已後風俗奢靡宴席以諠譁
沉湎爲樂而居重位秉大權者擾雜倨肆於公吏之間曾
無愧恥公私相効漸以成俗由是物務多廢獨聖心求理
安得不勞宸慮乎陛下宜頒訓令禁其過差則天下幸甚
時上荒于酒樂公著因對諷之頗深嘉納三月幽州劉總
請分割地土入朝公卿皆疑獨上推誠納之以宣武節度
使張弘靖爲幽州節度使以總爲鄆州節度使秋七月壬
子群臣上尊號曰文武孝德皇帝上受冊於宣政殿禮畢
御丹鳳樓大赦天下甲寅幽州監軍使秦軍亂囚節度使
張弘靖於別館害判官韋雍張宗元崔仲卿鄭墳軍人取

朱滔子洄爲留後洄自以年老令軍人立其子克融爲留後八月己巳鎮州監軍宋惟澄奏軍亂節度使田弘正并家屬將佐三百餘口並遇害軍人推衙將王庭湊爲留後二年二月甲子詔雪王庭湊仍授鎮州大都督府長史充成德軍節度等使三軍將士待之如初仍令韓愈往彼宣諭十月詔江淮諸州旱損田畝頗多所在米價不免踴貴眷言疲瘵須議優矜宜委淮南浙東浙西宣歙江西福建等道觀察使各於當道有水旱飢取常平義倉斛斗據時估減半價出糶以惠貧民十一月庚午命景王率禁軍五百騎侍從皇太后幸華清宮又幸石鑿寺癸酉上幸華清宮迎皇太后巡狩于驪山下卽日馳還皇太后翌日方還庚辰上與內官擊鞠禁中有內官歛然墜馬如物所擊上恐罷鞠升殿遽足病不能履地風眩就牀自是外不聞上

起居者三日十二月丁亥詔五坊鷹隼並解放獵具並毀之庚寅宰臣李逢吉率百僚至延英門請見上不許中外與裴度等三上疏請立皇太子辛卯上於紫宸殿見百官李逢吉奏景王成長請立爲皇太子左僕射裴度又極言之癸巳詔立景王爲皇太子景午上御宣政殿冊皇太子受冊畢百寮謁太子於東宮三年正月丁巳上以疾苦不受朝賀是日大風昏翳竟日四年正月辛亥上御正殿受朝如常儀上餌金石之藥虜士張臯上疏切諫上詔召之求臯不獲辛未上大漸詔皇太子監國事壬申上崩於寢殿時年三十謚曰睿聖文惠孝皇帝廟號穆宗葬于光陵

敬宗昭愍皇帝

唐書曰敬宗昭愍皇帝諱湛穆宗長子母曰恭僖太后王氏元和四年六月七日生於東內之別殿長慶元年封景

太平御覽 卷一百一十四
王二年立爲皇太子四年正月穆宗崩皇太子即位時年十六二月辛巳朔上縗服見羣臣於紫宸門外癸未貶戶部侍郎李紳爲端州司馬辛卯勅沒掖庭宮人先配內園宮人並宜放出任其所適己亥冊大行皇帝皇太后爲太皇太后三月上御丹鳳樓大赦天下天下常貢之外不得進獻六宅十宅諸王女宜令每年於選人中選擇降嫁甲寅始於延英對宰臣甲子故山南東道節度使牛元翼家屬悉爲王庭湊所害上惜其冤橫傷悼久之仍歎宰執非才縱姦臣跋扈翰林學士韋處厚奏曰理亂之本非有他術順人則理違人則亂陛下當食歎息恨無蕭曹今有一裴度尙不能用此馮唐所以感悟漢文雖有頗牧不能用也戊辰羣臣入閣日高猶未坐有不任立而踣者諫議大夫李渤出次白宰相俄而始座班退左拾遺劉棲楚極諫

頭叩龍墀血流上爲之動容景申賊張韶等百餘人至右銀臺門殺闔者揮兵大呼進至清思殿登御榻而食攻弓箭庫右神策軍兵馬使康藝全率兵入宮討平之是日上聞變急幸左軍丁酉上還宮羣臣稱慶諫議大夫李渤以上輕易致盜言甚激切五月制以吏部侍郎李程戶部侍郎竇易直並同中書門下平章事十二月廻鶻吐蕃奚契丹遣使朝貢寶曆元年春正月辛亥親祀昊天上帝于南郊禮畢御丹鳳樓大赦改元二月桂管防禦觀察使李德裕獻丹宸箴六首上深喜之命學士韋處厚優其荅詔四月群臣上徽號曰文武大聖廣孝皇帝御宣政殿受冊禮畢御丹鳳樓大赦天下七月甲申拾遺李漢舒元褒薛廷老於閣內論曰近日除授往往不由中書進擬多是內中宣出臣恐紀綱寢壞奸邪恣行伏希詳察上然之詔度支

進銅三千斤金簿十萬翻修清思院新殿及昇陽殿圖障
二年五月幽州軍亂殺其帥朱克融及男延齡軍人立其
第二子延嗣爲留後辛巳神策軍苑內古長安城中脩漢
未英宮掘地獲白玉牀長六尺六月減放苑內役二千五
百人帝性好土木自春至冬興作相繼庚申鄆州進驢打
毬人石定寬等四人辛酉幸凝碧池令兵士千餘人於池
中取大魚送入新池癸亥以旱命京城諸司疏理繫囚帝
好深夜自捕狐狸宮中謂之打夜狐十二月辛丑帝夜獵
還宮與中官劉克明田務澄許文瑞打毬軍將蘇佐明王
嘉憲石定寬等飲酒帝方酣入室更衣殿上燭忽滅劉克
明等同謀害帝卽時殂於室內時年十八謚曰睿武昭愍
孝皇帝廟號敬宗葬莊陵

太平御覽卷第一百一十四

